

RACH MAR DINI

Winjuru ,ritreuru gi thop jo Farisai.¹

Sani wiyeu ose wil kod makati abich manang'ing'o ni ji gana abich gi aditni apar gariyo mag ng'injo manodong' ,kata makati abiriyo manang'ing'o ni ji gana ang'wen to gi mathoth manodong' .Ok awuonu e chiemb pinyini.Ooyo ,abiro kwerou kod chamo rieko kod puonj mag miriambo mag jo dini.²

Gilama kayiem ka gi puonjo chik dhano ka puonj mag Nyasaye .Uweyo chik Nyasaye to umako tim dhano.³

Ritreuru ni jonabi mariambo ma biro gi lep rombe ,to e igi gin mana ondiegi mangemo .Gi luwo jatend gi mar adier ma en satan ,to gitimo dwache.En ne en janek nyaka chakruok,kendo ok ochung' e adiera ,nikech onge adiera e iye .Kowacho miriambo owacho kaka kido mare obet ,nikech en ja miriambo ,kendo en wuon miriambo.⁴

Ni jomecho moketre kaka jong'ad bura anyisou ni.buchu oseng'adnu un jotend dini kod jopuonje mariambo ma jogang wach !Uchiego dhood pinyruodh polo nyim ji,un uwegi ok udonjie ,bende jogo madwaro donjoe ok uyie mondo gidonjie.Uchamo ut mond liete to kata sa mutimo kamano ulemo aming'a mondo ji oneu;emomiyo bura maduong' moloyo nolou.

Uluoro nam gi piny mondo ulok ng'at achiel e dini maru to koselokre ,umiye doko wuod Gehenna moloyo un uwegi.

¹Mathayo 16:6

²Mariko 8:18-21

³Mariko 7:7-9

⁴Mathayo 7:15;Johana 8:44

Uyalo ni “Hekalu ok duong’ .Ni maduong’ en keno manie Hekalu.”

Ere maduong’ ;dhahabu manie kar keno kose hekalu mowalo dhahabuno mondo obed maler.?

To uwacho ni “kar misango ok duong’;ni mich manie wi kar misango ema duong”.

Un jo mofuwo kendo muofni .Ere maduong’ moloyo ;mich kose hekalu mowalo michno mondo obed maler?

Ng’atno mokuong’re gi kar misango kuong’re kode gi gik moko duto manie wi kar misango .to ng’at ma kuong’ore gi hekalu okuong’ore kode kaachiel gi jal ma odakie .Kendo ng’at ma okuong’ore gi polo okuong’ore gi kom duong’ mar Nyasaye kod jal ma obetie.

Uchiwo achiel kuom apar mar miény gi mito gi nyim,to uweyo weche madongo ma chik dwaro ;kaka ng’ado bura kare ,kod bedo mang’won kod bedo adier .Magieki e ma nonego utim to kata mamokogo kik uwe timo.

Un jotelo mamuofni ,ma dhing’o mbwambwa to mwonyo ngamia .Kaito ulwoko maler ng’e tawo,to igi opong’ gi owruok.Un muofni manadi !mokwongo luok i agwata mondo ng’eye bende obed maler .

Un jopuonje mariambo !E gango wach maru uchalo gi liete mobuk matar,manenore maber malich gi oko ,to igi opong’ gi choke jo motho kod yuothruok duto.E kaka un bende gi oko unenore nyim ji ka jo makare to e iu upong’ gi gango wach kod richo.Unyalo hulo yie nadi , un ma udak gi pako mag joweteu to ok udwar pako mowuok kuom Nyasaye kende?⁵

Umwono liete jonabi kendo uloso maber liete jo makare kendo uwacho ni “dine wabedi e ndalo mag kwerewa dine ok wariwore kodgi e chuero remb jonabi.”

Omiyo udoko joneno kuomu uwegi ni un yauot jogo ma nonego jonabi.Pong’uru apong’ a rapoch kwereu.

Un thuonde ,un nyithind thuonde ,nuring nadi buch gehenna ?E momiyo aoro iru jonabi gi jo mariek gi jondiko .jo moko kuomgi ununegi kendo unugur ,kendo jo moko unuchwad e sunagokeu,kendo unusandgi kulawogi koa e dala achiel nyaka dala machielo.⁶

Un jomagango wach ,Isaya nowaacho kare kuomu ni “oganadani paka gi dhogi to chunygi bor koda”.⁷

⁵ Mathayo 23:13-28,Johana 5:44

⁶Mathayo 23:29-34.

Un jo ma wuorore nyim ji ni un jo makare ,to Nyasaye ong'eyo chunyu;nikech gi ma ji pako rach ahinya nyim Nyasaye.⁸

Awachonu ni ,ji mang'eny nobi moa yor wuok chieng' kendo ginibed kod Ibrahim gi Isaka gi Jakobo e pinyruodh polo .To nyithind pinyruodh polo noriemb oko e mudho mandiwa .Ok unudonj ngang' e pinyruodh polo .ka ok timu makare oloyo tim makare mar jondiko gi jo Farisai.⁹

⁷ Mathayo 15:7,8,Isaiah29:13

⁸ Luka 16:15

⁹ Mathayo 8:11,12;5:20

LER MA

ORIENYO PINY

An ler asebiro e piny mondo ng'a mayie kuoma kik obedi e mudho ,an e ler mar piny Ng'a ma luwa ok nowuoth e mudho ngang' to nobed gi ler mar ngima .¹⁰

Ma e bura ni ler osedonjo e piny ,to ji nohero mudho moloyo ler ,nikech timbegi ne richo .Nikech ng'a matimo mamono osin gi ler ,kendo ok odhi e ler ,kik timbene okwer .To ng'a ma timo adiera dhiyo e ler ,mondo timbene ong'ere e lela ,ni itimogi kuom Nyasaye.¹¹

Un nuoro joote ir Johana kendo nuwacho adiera ni.jal cha ne en taya maliel kendo marieny,kendo un bende nuyie mor e lerne kuom kinde matin.To aseyudo neno maduong' moloyo mano mar Johana nikech tije ma ne wuora omiya mundo atieki tijego e ma atimo e ma nyiso ni wuora e ma noora.

Ka ok atimo tije Wuora kik uyiea .To katimogi kata ok uyiea ,yieueu tijego;mondo wach odonjnu ,kendo ung'e Wuoro ni e iya,kendo an e i wuoro .Onego watim tich Jal ma noora ,ka pod odiechieng' ;otieno biro ma ng'ato ok nyal tiyoe.¹²

Taya mar ringruok en wang' .Ka wang'i ngima ,ringri duto nobed gi ler .To ka wang'i rach ringri duto nobed mudho.E momiyo ka ler man e iyi en man mudho,en mudho molil miwuoro.¹³

Ok ntie seche apar gariyo e odiechieng' ngima koso?Ka ng'ato wutho godiechieng' ok ochwanyre nikech oneno ler mar pinyi.To kaa ng'ato wuotho gotieno ochwanyre nikech ler ongene .Wuothuru kaa pod un gi ler ,mondo kik mudho nwang'u.

¹⁰ Johana 12:46;8:12

¹¹ Johana 3:19-21

¹² Johana 5:33,35,36;10:37,38;9:4

¹³ Mathayo 6:22,23

Ng'ato ma wuotho e mudho kiya ku modhiyoe .Ka muofu otelo ni muofu wadgi ,ji ariyogo duto nopalhi e bugo.¹⁴

Onge ng'at ma kose moko taya ,to ume gi mbiru,kata keto e bwo ng'angu ;to okete e wi rachung taya ,mondo ji ma donjo one lerne.Un e ler mar piny,dala moger e wi got ok nyal geng'ore .Kamano ler maru mondo orieny e nyim ji,mondo gine tichu mabeyo ,kendo gimi wuonu me polo duong' .Wach mawachonu apanda wachuru e lela ;kendo wach muwinjo okuodhnu e itu,huluru e wi tedini.¹⁵

¹⁴ Johana 11:9,Mathayo 15:14;Johana 12:36

¹⁵ Luka 8:16;Mathayo 5:14,16;Luka 8:17;Mathayo 10:27

FWENY

Sa osechopo mibiro miyoe wuod dhano duong'.¹⁶

An ok adwar duong' mara;nitie Jal ma dware kendo mang'ado bura.¹⁷

E chiku nondiki ni wach ji ariyo en adier .An e manyiso kuoma awuon kendo Wuoro ma noora bende nyiso kuoma .Nitie ng'ato machielo ma janenona ,kendo ang'eyo ni neno mare kuoma en adier .Nikech ma ok adwar neno mar jopiny.¹⁸

Ng'ato mawacho wachne owuon ,dwaro duong'ne owuon ;to ng'at ma dwaro duong' mar Jal ma noore en adier ,kendo wach ma ok kare onge e iye .¹⁹

Ok abiro gi tekona awuon ;to ng'a ma noora en adier .Nikech nalor a e polo ,ok ni mondo atim dwarona awuon to dwaro mar Jal ma noora .Gi momiyo nonywola ,kendo gi momiyo nabiro e piny ka,en ni mondo abed janeno kuom adiera .Ng'ato ka ng'ato man kuom adiera winjo dwonda.²⁰

An gi Wuoro wan achie .An nabiro mondo gibel gi ngima kendo gibel godo moloyo.²¹

Loch duto omiya gi piny .Amoyou ngima mochwere to kod teko moloyo teko duto e wi ja sigu.Kuwe aweyonu,kuwena amiyou .an ok amiyou kaka piny miyou kik chunyu parore ,kendo kik uluor .Kendo unung'e adiera kendo aidera nomiu bedo thuolo ;omiyo ka Wuowi omiyoo thuolo ;eka unubed thuolo adier.²²

16 Johana 12:23

17 Johana 8:50

18 Johana 8:17,18;5:32

19 Johana 7:18

20 Johana 10:30;10:10,9

22 Johana 10:28;14:27;8:32,36;15:11.

Nikech ma e dwaro mar Wuora ni ng'a ma neno Wuowi kendo yie kuome ,obed gi ngima mochwere ;kendo nachiere chieng' giko .In iyie kuom Wuod Nyasaye koso?En e mowuoyo kodini bende.²³

²³ Johana 6:40;9:35,37.

WACH NGIMA

Wuoro ma noora ,en nomiya chik gi gima onego awchi ,kendo gi ma onego aluw .Kendo ang'eyo ni chikne e ngima mochwere .Weche ma wacho awacho kaka ne Wuoro owachona.²⁴

Wach muwinjo ok wachna ,to mar Wuoro maa noora .Ng'a ma winjo wachna ,kendo yie kuom Jal ma noora ,en gi ngima mochwere ,kendo okodhi e bura to osea e tho kendo osedonjo e ngima .²⁵

Awachonu ni,ndalo biro ,kendo osechopo ,ma jo motho nowinj dwond Wuod Nyasaye ;kendo jo mowinjo ginidok mangima.²⁶

Unono ndiko ,nikech ugalo ka kuom ndiko un gi ngima mochwere ;to ndikogi bende e ma nyiso kuoma ;to un udagi biro ira ,mondo ubed gi ngima .²⁷

Wuoro ma noora ,owuon nobedo janeno kuoma .Pok uwinjo dwonde ngang' ,kata kite pok uneno ;bende wachna ok obet e iu ,nikech ok uyie Jal ma nooro.²⁸

Ukelo wacho nadi kuom ng'at ma Wuoro nowalo ,kendo nooro e piny ni “Ipiem gi Nysaye ;nikech awcho ni “an e wuod Nyasaye?”²⁹

An e yo ,kendo an e adiera ,kendo an e ngima ;ng'ato ok bi ka Wuoro ma ok okadho kuoma .Chuny e ma kelo ngima ;ringruok ok nyal gimoro .Weche masewachonu gin chuny ,kendo gin ngima.³⁰

Kendo ka ng'ato owinjo wechena to omakogi ,an ok ang'adne bura ;nikech ne ok abiyo ng'ado ni piny bura ,to mana mondo ares piny.Ng'ato ma daga ,ma ok oyie wechena ,en gi jang'adne bura;wach masewacho e ma nong'adne bura chieng' giko.³¹

24 Johana 12:49,50

25 Johana 14:24;5:24

26 Johana 5:25

27 Johana 5:39,40

28 Johana 5:37,38

29 Johana 10:36

30 Johana 14:6;6:23

31 Johana 12:47,48.

Polo gi piny norum to wechena ok norum ngang'.³²

³² Mathayo 24:35

WUORO

Uneno nadi kuom Kristo?En wuod ng'a?³³

Gik moko duto Wuora oseketo e tekona ;kendo onge ng'a mong'eyo Wuowi mak mana Wuoro ;kata Wuoro bende onge ng'a mong'eyo mak mana Wuowi ,kod ng'atno ma Wuowi oyie elone .An ang'eye nikech aa kuome ,kendo en a ma noora .³⁴

Jal ma noora ni koda .Ok oweya kenda nikech an atimo malong'one ndalo duto .Ng'a mosenena oseneno Wuoro ;kendo iwacho nadi ni nyiswa Wuoro ?Ok iyie ka an e i Wuora ,kendo Wuoro ni e iya ?³⁵

Wuowi ok nyal timo gimoro kende ,to mana gi ma wuoro timo .Nikech gi ma Wuoro timo,Wuowi bende timo ,Wuowi bende timo mana kamano .Nimar Wuoro ohero Wuowi ,kendo onyise weche duto motimo owuon ;kendo enonyise tich madongo moloyo magi mondo un uwuor .Nikech kaka Wuoro chiero jomotho ,kendo omiyogi ngima e kaka Wuowi bende timo ;jogo modwaro miyo ngima omiyogi.³⁷

Wuowi ok nyal timo gimoro kende to mana gi moneno ka Wuoro timo ;Ang'ado bura mana kaka Wuoro nyisa ;to yore na bende kare .Nikech ak atim dwacha to mana dwach Wuoro ma noora .Kaka Wuoro nigi teko mar chiwo ngima ,e kaka Wuowi bende nigi ngima to omiye loch mar ng'ado bura nikech en Wuod dhano.

An e mano ma awachonu nyaka a chakruok.An gi weche ma adwaro wacho kuomu kando ng'ado bura kuomu;to Jal ma noora en adier ,kendo an awacho ni piny mago masewinjo kuome.³⁹

³⁵ Johana 8:29

³⁶ Johana 10:30;16:15,28

³⁷ Johana 5:19-21

³⁸ Johana 5:19,26,27,30

³⁹ Johana 8:25,26

Chieng' kuseting'o Wuod dhano malo ,eka unung'e ni en ,kendo ni ok atim gimoro gi tekona awuon ,to awacho wechegi mana kaka Wuoro nopusonja .⁴⁰

⁴⁰ Johana 8:28

JAKWATH MABER

Kiki uluor kweth matin ;nikech Wuoro ohero miyou pinyruoth.⁴¹

An e jakwath maber ;kendo ang'eyo maga awuon to maga bende ong'eya ,kaka Wuoro ong'eyo kendo an ang'eyo Wuoro ;kendo aweyo ngimana nikech rombe.Romba winjo dwonda kendo ang'eyogi kando giluwa ;kendo onge ng'ato ma nyalo mayagi e lweta .Gima Wuora nomiya ,duong' moloyo duto ,kendo onge ng'ato manyalo golo e lwet Wuora .An gi rombe moko to ok gin e kundni.Gin bande onego kelgi ,kendo dwonda giniwinji ;to nobedie kweth achiel ,gi jakwath achiel.⁴²

To ng'at ma donjo koluwo e dho rangach ,en e jakwath rombe .Jarit rangach yawone ;kendo rombe winjo dwonde ;mi oluongo rombe maage owuon gi nyunggi kendo otelonigi oko.Kosegolo rombe mage duto oko ,otelo nyimgi rombe bende luwe,nikech ging'eyo dwonde .Ng'at mawendo ok giluw bang'e ,to giringe nikech gikiya dwond welo.⁴³

An e jakwath maber .Jakwath maber oweyo ngimane nikech rombe .Jatich ma ok jakwath ,ma ok wuon rombe ,koneno ondiek ka biro ,oweyo rombe ,kendo oringo ;eka ondiegno mako rombe kendo keyogi.⁴⁴

An e dho ranga rombe .Ng'at ma ok luw e dho rangach ,kodonjo e kund rombe ,to oidho gi ka machielo ng'atno en jakuo kendo jamecho.Jogo duto ma nobiro ka pok abiro gin jokuo ,kendo gin jomecho ,to rombe ne ok owinjogi.An e dho rangach ;ng'at ma donjo kuoma nodonj ,kendo nowuog oko,kendo nonwang' chiemo.⁴⁵

Jakuo ok bi to mana ni okwal,kendo onegi,kendo okethi.An nabiro mondo gibed gi ngima ,kendo gibed godo moloyo.⁴⁶

⁴¹ Luka 12:32

⁴² Johana 10:14,15,27-29,16

⁴³ Johana 10:11,12

⁴⁴ Johana 10:11,12

⁴⁵ Johana 10:7,1,8,9

⁴⁶ Johana 10:10.

CHIEMB RINGRE

Nondiki niya “dhano ok nobed mangima gi kuon kende to gi weche duto mowuok e dho Nyasaye.⁴⁷

An e kuon mar ngima ;ng'a ma obiro ira ok nowinj kech ngang' ,kendo ng'a ma yie kuoma riyo ok nomake ngang' .An e kuon mangima ma nolor a e polo .Ng'a ma chamo kuonni nobed mangima nyaka chieng' ;kendo kuon ,ma nachiw ni ngima mar piny en ringra.⁴⁸

Kik uti mondo unwang' chiemo makethore ,to tiuru ni chiemo ma siko e ngima mochwere ,ma wuod dhano nomiu ;nikech en ema Nyasaye Wuoro oseketo kido mare kuome.⁴⁹

Kwereu nochamo manna e thim ,kendo ne githo,Musa ne ok omiyoo kuonno moa e polo ;to Wuora miyou kuon madier moa e polo .Nikech kuon mar Nyasaye e ma lor a e polo ,ma miyo piny ngima .⁵⁰

Ka da ing'eyo mich mar Nyasaye ,kendo ni en ng'ano ma wachoni ni “miya pi amodhi”,in da ikwaye ,kendo domiyi pi mangima .Ng'a ma mdho pigni,riyo nomake kendo;to ng'ato ma modho pi ma an namiye ,riyo ok nomake nyaka chieng' ,to pi ma an namiye nodok soko mar pi e iye mabubni e ngima mochwere.⁵¹

Ng'ato ma riyo omako ,ber mondo obi ira omodhi,koyie kuoma;kaka ndiko owacho .E iye aore mag pi mangima nowuogie ka mol.⁵²

47 Mathayo 4:4;Rapar mar chik 8:3

48 Johana 6:35,48-51

49 Johana 6:27

50 Johana 6:49,32,33

51 Johana 4:10,13,14

52 Johana 7:37,38.

MIGAWO MAR ARIYO

PINYRUOTH MANYIEN.

PINYRUODH POLO

N yka a ndalo mag Johana jabatiso nyaka chil kawuono ,pinyruodh polo ilaro gi teko ,kendo joteko yake.⁵³

Pinyruodh polo porore gi ng'at moro ma nochwoyo kodhi e puothe .To ka ji nindo jasike nobiro mochwoyo ogolo bende e dier ngano ,kendo noa odhi.Eka ka ite notwi monyak ,ogolo bende nonenore .Wasumb wuon pacho nosudo ire mowachone niya “ruoth ok nichwoyomkodhi maber e puothi koso?To ogolo mantie oa kure ?”

Nokonigi ni “ng'at moro ma ja sigu e motimo mano.”

To wasumbni nowachone ni “ara idwaro wawuogi wachokgi koso?”Nowachonigi ni “ooyo dipi ni kuchoko ogolo to upudho ngano kodgi .Wegiurur gidongi kaachel nyaka chop ndalo keyo ;eka e ndalo mar keyo anawach ni jokeyo ni “chokuru ogolo mondi ,utuegi ndudi ndudi mondo uwang’gi ;to ngano chokuru uk an e decha.”

Jachwo kodhi maber en wuod dhano;puodho en piny ngima ;kodhi maber ,mago gin nyithind pinyruoth ;to ogolo gin nyithind ng'a marachno;jasiguno mochwoyo ogolo en satan ;keyo en giko mar ndalo ;to jokeyo gin malaika .Kaka ichoko ogolo ,kendo iwang'o gi mach ,e kaka nobedi e giko mar ndalo.Wuod dhano noor malaikane ,mi ginichok gik moko duto ma kelo chawnryuok ,kod ji duto ma timo maricho,kendo ginigolgi oko e pinyruodhe ,mi giniwitgi e mach maduong' maliet mager;kanyo ywagruok nobedie kod muodo lak .Eka jo makare norieny kaka wang' chieng' e pinyruodh wuon gi .Ng'at man gi it mondo owinji.

Pinyruoth ka pinyruoth mopogore ,okethore kendo dala kata ot mopogore ,ok nyal chung' .To satan ,opogore owuon ,omiyo pinyruodhe nochung' nadi?

Ng'ato nyalo nadi donjo e od jateko moyak gige ma ok okwongo tueyo jatekono?Ka an agolo jochiende gi teko mar beelzebul,nyithindu to gologi gi teko ng'a?

53 Mathayo 11:12

54 Mathayo 13:24-30;37-43

E momiyo jogo nodoknu jong'ad bura .To ka an agolo jochiende gi teko mar roho mar Nyasaye ,kara pinyruodh Nyasaye osebironu.⁵⁵

To pok usomo e ndiko niya “kidi ma jogedo nodagi,osedoko kidi moriwo kor ot;mani en tich ruoth,kendo kwanene en gi miwuoro .E momiyo awachonu niya,pinyruodh Nyasaye enogol kuomu ,to enomi oganda moro ma nyago olembe mag pinyruoth.⁵⁶

Richo duto nowe ni ji,gi ayany duto ma giyanyogo Nyasaye ;to ng'a ma noyany Roho maler ok nowene nyaka chieng' ,to bura mar ketho mochwere oloye.Josol osuru gi ndhegini nodonj e pinyruoth polo motelo nu.Gi winjo luong ,mar ngima bu giluwo Nyasaye.To jogo ma kare ,owinjo luong to gitamore kendgi.⁵⁷

Ok jiduto ma luonga ni “Ruoth Ruoth”e ma nodonj e pinyruodh polo;to mana ng'atno ma timo gi ma Wuoro me polo dwarz.

Ka jaduong' ot osechungo ,kendo ochiego dho ot ,nuchak chung' oko ,kendo dwong'o dho ot kuwacho niya “ruoth yawnwa”.

Eka nodwoku ni “akiyau ku muae”.

Sano unuchak wacho niya “ne wachiemo ,kendo metho kodi,kendo nipuronjo e yorewa”.To enowachnu ni “akiyau ku muae ;auru kuoma ,un duto ma timo richo”.

Ji mathoth nowachna niya “Ruoth ruoth ,ne ok wakoro wach e nyingi koso,kendo e nyingi ne ok wagolo jochiende ,kendo e nyingi ne ok watiyo tije madongo mang'eny?

Eka nawachnigi niya “ok ang'eyou ngang' auru kuoma ,un jo ma timo richo”.

Un omiu ng'eyo wach moum mag pinyruoth mag pinyruodh Nyasaye ;to jo moko duto iwachonigi gi ngache,mondo kata gineno to ok gine,kendo kata giwinjo to kik wach odonjnigi.⁵⁹

55 Mathayo 12:25-29

56 Mathayo 21:42,43

57 Mariko 3:28,29;Mathayo 21:3,32

58 Mathayo 7:21;Luka 13:25-27;Matahyo 7:22,23

59 Luka 8:10.

Pinyruodh plp porore gi ng'ato ma ne dwardo dhi e wuoth ku mabor,moluongo joticne ,kendo noketo e lwetgi ;nomiyo ng'at moro talanta abich ,to moro ariyo ,to moro achiel .Komiyo ng'ato ka ng'ato kaka tekre owuon obet;eka nodhi e wuoth mabor.

Gikanyono ng'atno monwang'o talanta abich noloko godo,moyudo ohala talanta abich moko ,kamano ng'atno monwang'o ariyo noyudo ariyo moko.

To ng'atno monwang'o achiel nodhi mokunyo bur e lowo mopandoe pesa ruodhe.

Bang' ndalo mang'eny ruodh jotijgo noduogo kendo notimo kweno kodgi.

Ng'atno monwang'o talanta abich nobiro mokelo talanta abich moko kowacho niya "ruoth niketo e lweta talanta abich ;ne aseyudo abich moko.To ruodhe nokone ni "ber in jatich maber kendo mogen ;isebedo ng'at mogen kuom gik manok anaketi e gik mang'eny .Donji e mor mar ruodhi."

Ng'atno monwang'o talanta ariyo bende nobiro nowacho niya "ruoth niketo e lweta talanta ariyo ,ne aseyudo ohala talanta ariyo moko" .Ruodhe nokone ni "ber in jatich maaber kendo mogen ,isebedo mogen kuom gik manok ,anaketi e gik mang'eny .Donji e mor nar ruodhi."

To ng'aatno monwang'o talanta achiel bende nobiro ,nowacho niya "ruoth nang'eyo ni in e ng'at makoch ;ikeyo ka ma ne ok ichuoyoe ,kendo ichoko kama ne ok ikiroe .Omiyo naluor ,mi nadhi apando talantni e lowo .Ne eri ! kaw giri nogo".

To ruodhe nokone ni "in jatich marach kendo ma jasamuoyo ;kara ning'eyo kakeyo ka ma ne ok achuoyoe ,kendo achoko ka ma ne ok akiroe .Omiyo ne owinjore mondo iter pesana ka jokan pesa,eka an kabiro dayud mara awuon kod ohande."

E momiyo goluru talantano kuome ,umi ng'atno man gi talanta apar.Nikech ng'ato ka ng'ato man gi gimoro nomedi,kendo nomew;to ng'at ma onge gimoro kata ma en go chieng' nomaye.

Kendo jatichno ma onge ohala wituru oko e mudho mandiwa ;kanyo ywagruok nobedie kod muodo lak.⁶⁰

60 Mathayo 25:14-30

Nimar minyruodh polo chalo gi ng'at ma wuon pacho ma nowuok gokinyi mang'ich mondo owak jotich odhi oti e puthe mar mizabibu .Ka nosewinjore gi jotich ni ochulgi dinari achiel kuom odiechieng' achiel noorogi e puothe mar mizabibu.

Kendo nowuok kar sa adek moneno jo moko kochung' nono e chiro ;nowachonigi ni “un bende dhiuru e puotha mar mizabibu ,kendo gino makare ema namiu”,mi gidhi.

Eka nowuok kendo kar sa auchiel gi kar sa ongachel bende ,kotimo kamano.To kar sa apar gachel nowuok monwang'o jo moko kochung' ,kendo nowacho nigi niya “marang'o uchung' nono ka eri odiechieng' ngima?”

Ne giwachone ni “nikech onge ng'ato mosewakowa”.

Nokonigi ni “dhiuru un bende e puotha mar mizabibu”.

Godhiambo wuon puoth mizabibuno nowacho ni nyapache niya “luong jotich imigi pokgi, ki chako gi jomachien nyaka jo mokwongo”.

Jo mako tich sa apar gachel nobiro moyudo dinari achiel achiel .Ka ne gineno kamano jogo manowak gokinyi mang'ich noparo ni gibiro yudo mang'eny moloyo jowadgi.Ka ne gibiro to gibende ne guyudo mana dinari achiel achiel.

Ka ne guyudo ne ging'ur kod wuon pacho ni “jo machien gi osetiyo mana sa achiel kende ,to isemiyogi bedo marom kodwa ,wan mwasechandore odiechieng' ngima ka chieng' kech.

Nodwoko ng'at achiel kuomgi niya “omera ok atimoni marach.Nende ok oyie koda ni achuli dinari achiel koso?Omiyo kaw marino kendo dhi adhia ,adwaro miyo ng'at machienni kaka amiyi.Ok en kare timo kaka adwaro koso?Koso ich lit omaki nikech atimo maber?”

Kamano jo machien nobed jo motelo,to jomotelo nobed jo machien.Nimar jo miluongo ng'eny to jo miyiero nok.⁶¹

Pinyruodh polo chalo gi jahono ma dwarz lulu mabeyo.Kosenwang'o lulu achiel ma negone tek ahinya ,oloko gik moko duto ma en go ,mong'iewe .⁶²

Jogo madonjo e pinyruodh polo ok oyie mondo mag piny ogeng' gi.Chalo gi jahono ma ne dwarz lulu manengone tej ngimane duto

⁶¹ Mathayo 20:1-16;22:14

⁶² Mathayo 13:45,46

Gi manyo gi mor mondo gimak lulu manengone yot ma en ngima mochwere ,paaro manyien sani to kod piny mabiro.⁶³

Pinyruodh Nyasaye chalo gi koth karadali ma ng'at moro nochwoyo e puothe .Otin ni kodhi duto,to kosedongo oloyo alote duto gi duong' ,kendo odoko yath ma winy mag polo biro kendo dake e bedene .

Pinyruodh polo chalo gi thowi ma dhako nokawo ,kendo noruw gi mogo atonge adek,nyaka duto yiency.⁶⁴

Kendo pinyruodh polo chalo gi gogo mobol e nam mochoko rech ngeche duto.Ka nopong' ne giywae e dho wath ;Kendo ne gibet piny ,mi gichoko mabeyo e atonge to maricho giwito oko.E kaka nobedi e giko mar ndalo ,malaika nowuogi kendo ginipog jo maricho kod jo makare ,mi giniwit jo maricho e mach maduong',mager,maliet; kanyo ywagruck nobedie kod muodo lak.⁶⁵

E ndalogo ma naorou kuonge kirowe kaka ndede kata wuche bende ,nuchando gimoro koso?Kamano kik uparru kuom kiny nikech nopalre owuon.Ere ng'ato kuomu ma nyalo medo bat achiel e borne kuom parruok?⁶⁶

Nonuru winy me polo ,kaka giwicho kata gikeyo ,kata keno e dere ;to wuonu me polo e ma miyogi chiemo.To un ok uloyogi ahinya koso?⁶⁷

To oyundi ariyo ok ing'iew gi hela achiel koso ?Kata kamano achiel kuomgi ok nolwar piny ma ok wuonu ong'eyo.To kata mana yie wiu osekwan duto.⁶⁸

Kendo ang'o momiyo uparoru kuom lewini ?Paruru ondango mag thim ,kaka gidongo ;ok giware gi tich ,kata wicho ,to awchonu ni,kata Solomon e duong'ne duto ok norawakre kaka achiel kuom mago .Ka Nyasaye rwako lum me thim kamano,mantie tinende ,to kiny iwite e mach,ok norwaki maber moloyo .Ere kaka unyalo bedo giyie matin kama ?

63 Mathayo 4:26-29

64 Mathayo 13:31-33

65 Mathayo 13:47-50

66 Luka 22:35;Mathayo 6:34,27

67 Mathayo 6:26

68 Mathayo 10:29,30

E momiyo kik uparru kuwacho ni wanaacham ang'o? Kata wanamadh ang'o? Kata wanarwakre gang'o? Nikech mago duto e ma jo ma ok oyie dwaro ,to Wuonu me polo ong'eyo ni uchando maagi duto.

Dwarurur mokwongo pinyruodhe gi wachne makare ;eka mago duto nomednu.⁶⁹

⁶⁹ Mathayo 6:28-33

CHIK MOKWONGO

Chik maduong' moloyo duto en ni iher Ruoth Nyasachi gi iyi duto ,kendo gi chunyi duto ,kendo gi riekoni duto,kendo gi tekoni duto.⁷⁰

Mar ariyo en ni her wadu kaka iherori iwuon.⁷¹

Onge chik moro machielo moloyo magi ni uheroru ng'ato gi ng'ato kaka aherou .Onge ng'ato man gi hera moloyo ma ,ni ng'ato oweyo ngimane nikech osiepene!⁷²

E momiyo ng'ato ma ketho achiel kuom chik matindogo moloyo ,kendo puonjo ji kamano ,nobed ng'a matyin ahinya e pinyruodh polo ,to ng'a ma timogi kendo puonjogi ,jagono nobed maduong' e pinyruodh polo .Wechegi awachonu mondo morna obedi e iu mondo moru orom chuth.⁷³

Usewinjo ka nowach ni “her wadu ,to sin gi ja siki”.

An to awchonu ni ,herurur wasiku ,kendo lamuru ni jo ma sandou ,mondo ubed nyithind Wuonu me polo ;nikech omiyo wang' chieng' mare wuok ni jo maricho kod ji mabeyo ,kendo oolo koth ni jo makare kod ji ma ok kare .Nikech kuhero jo ma oherou ,ere pok munwang'o? Josol osuru ok tim kamano koso?
To kumoso oweteu kende ,ere gi muloyogo jo moko ?Ogendini bende ok tim kamano koso?

Chik manyien amiyou ,mondo uherru ng'ato gi ng'ato,mana kaka yandi aherou ,mondo unubende uherru kamano.Ma eri e ma nomi ji duto ong'e ni un jopuonjrena ,ka un uheroru ng'ato gi ng'ato.Ng'a mohera nomak wachna ;Wuora bende nohere kendo wanabi ire ,kendo wanabed kode.⁷⁵

70 Mariko 12:29,30;Rapar mar chik 6:4

71 Mariko 12:31;Jolawi 19:18

72 Mariko 12:31 ;Johana 15:12,13;Mariko 12:31

73 Mathayo 5:19;Johana 15:11

74 Mathayo 5:43-47

75 Johana 13:34,35;14:23

Wuoru owuon oherou nikech un uhera ,kendo uyie ni an naa ka Wuoro ,kaka Wuoro osehera e kaka an bende aherou ,sik uru e herana .⁷⁶

Ng'ato moro nolor oa Jerusalem kodi Jeriko ,mi noromo gi jomecho ma nomaye lepe ,mogoye lero,modhi oweye kodwaro tho.To jadolo moro bende nolor e yorno,ka nonene nokadho e dir yo komachielo.

Kamano ja Lawi bende nobiro kanyo,monene ,mokadho akadha.

To ja Samaria moro ,to ne ni e wuoth ,nobiro ka ma ne entie ,kendo ka nonene nokeche.Nosudo bute ,motweyo kuonde mohinyore moonjoe divai;eka nokete e nyumbune owuon,moter e od welo,morite maber.

Kinyne nogolo dinari ariyo ,nomiyo wuon od welo ,kowacho ni “rite maber to pesa motiyonego moloyo mago ,an awuon nachuli chieng’ maduogo.

Kuom ji adekgo ere jal migalo ka ne wadgi gi ng’atno ma noromo gi jomecho?

Dhiyo in ibende itim kaka ja Samaria no timo.⁷⁷

⁷⁶ Johana 16:27; 15:9

⁷⁷ Luka 10:30-37

MIGAWO MAR ADEK

PUONJ MADUONG'

CHIK MANYIEN

Ng'ato ka ng'ato ma winjo wechenagi ,kendo timo enochal gi ng'at ma riek mogero
ode e wi lwanda .⁷⁸

Koth nochue ,mi ohula nobiro ,kendo yamo nokudho,mogoyo odno,to ok
nopodho;nikech misene nokuny e wi lwanda .

E momiyo ng'ato ka ng'ato ma winjo wechenagi to ok tim ,enochal gi ng'ato mofuwo
mogero ode e wi kuoyo . Koth nochue ,mi ohula nobiro ,kendo yamo nokudho
mogoyo odno ;mi nopodho ,kendo podhone ne duong'.⁷⁹

Jo ariyo noidho odhi lemo e hekalu ;achiel ne ja farisai,to machielo ne jasol osuru .Ja
farisai nochung' ,molemo kende kama ."Nyasaye agoyoni erokamano ni an ok achal
gi jo moko duto ,ma jomecho,jo ma gango wach,jo ma terore ,kata gi ja sol osuruni.
Ariyo kech ndalo ariyo juma,kendo kuom gik moko duto manwang'o achiwo achiel
kuom apar ."

To jasol osuru nochung' gi ku mabor,ne ok odwar kata chomo wang'e e polo ,to
nogoyo kore kowacho niya "Nyasaye ikecha ,an jaricho".

Akonu ni ng'atni nolor odhi e ode kokete kare,moloyo ng'at machielo cha ;nikech
ng'ato ka ng'ato ma pakore ,chieng' nochaye ;to ng'ato ma chare chieng' nopake.

Yieuru ni nyithindo matindo obi ira.Kik utamgi ;nikech pinyruodh Nyasaye en mar jo
ma chalo kamagi .Ng'at ma ok orwako pinyruodh Nyasaye kaka nyathi matin ,ok
nodonjie ngang'.⁸⁰

Ng'at moyie timo gi ma en odwaro,e ma nopog wach kuom puonjni, ka en mar
Nyasaye ,kata awacho wachna awuon.Puonjna ok mara ,to mar Jal ma noora.⁸¹

79 Mathayo 7:24-27

80 Mathayo 7:24-27

81 Luka 18:10-14,16,17

82 Johana 7:17,16.

Un ulamo gi ma okung'yo;wan walamo gi ma wang'ey,nikech warruok a kuom joYahudi ,kendo osechopo ma jo ma lamo Nyasaye ok giniring koni gi koni ka gi dwaro ka ma Nyasye nitie ka giwacho ni “eri go e kaeri e kama onego walemie.”

Jo ma lemo adier ginilam Wuoro e chuny kendo e adiera ,nikech Wuoro dwarzjo ma kama mondo gibel jo ma lame.Ka jogi oling' ,to kitegi biro kok.⁸²

Pok usomo gi ma ne Daudi otimo ka nodenyo en gi jo man kode koso?Kaka nodonjo e od Nyasaye ,kendo ne gichamo makati moket e nyim Nyasaye ,ma en kuero mondo en ocham ,kata jogo ma ne en godo,mak mana jodolo kendgi.

Kata pok usomo e chik ni,e chieng' sabato ka jadolo tiyo e Hekalu ,giketho sabato ,to giopnge bura .To akonu ni ka eri nitie gi maduong' moloyo Hekalu .Ka dine ung'e tiend wachni,ng'wono ema adwaro ,to ok misango,dine ok uketo bura ni jo ma onge bura . Nikech wuod dhano en Ruodh sabato.

Ere ng'ato kuomu man gi rombo achiel ma opodho e bugo chieng' sabato ,to ok omake kendo ogole oko?To dhano loyo rombo nyadidi ! E momiyo an kare timo maber chieng"sabato ,kik ung'ad bura gi kit nenruok maoko,to ng'adurur bura modhi kare .Sabato nochwenu ,ok nochwe ni Sabato.⁸³

An ok abiro e piny ka nikech bura ,ni jo ma ok nen mundo onen,kendo jo ma neno odok muofni.⁸⁴

82 Johana 4:21-24; Luka 19:40

83 Mathayo 12:3-12; Johana 7:23,24

84 Johana 9:39.

GWETH

Gin jo moguedhi ma winjo wach Nyasaye ,kendo mako.⁸⁵

Jatichno en ng'ato moguedhi ma ruodhe kobiro nonwang' kotimo kamano.

Mano mor manadi ni jo ma chan e chunygi ;nikech pinyruodh polo en margi.

Mano mor manadi ni jo ma ywak ;nikech nohogi.

Mano mor manadi ni jo mamuol ;nikech gininwang' piny ka girkeni margi.

Mano mor manadi ni jo ma kech gi riyo omako kuom dwaro wach makare ,nikech giniyieng'.

Mano mor manadi ni jo mang'won ;nikech giniyud ng'wono.

Mano mor manadi ni jo ma chunygi ler ;nikech ginine Nyasaye .

Mano mor manadi ni jotheck ;nikech enochaggi ni nyithind Nyasaye.

Mano mor manadi ni jo misando nikech wach makare ;nikech pinyruodh polo en margi.

Mano mor mandi ka ji yanyou ,kendo sandou ka giwacho weche maricho duto mag miriambo kuomu nikech an . Moruru kendo iluru ,nikech pok maru duong' e polo ,nikech kamano e kaka ne gisando jonabi ma nokwonganu.⁸⁷

Gin jo moguedhi ma ok onena to ok oyie .To un wengeu oguedhi,nikech gineno ;itu bende nikech giwinjo.⁸⁸

85 Luka 11:28;Mathayo 24:46

86 11:28;Mathayo 24:46

87 Mathayo 5:3-12

88 Johana 20:29;Mathayo 13:16.

Bi uru un jo mguedhi mag Wuora ,chamuru gikeni mar pinyruodhno moikni nyaka a chakruok piny .⁸⁹

⁸⁹ Mathayo 25:34

TEKO MANIE LAMO

Nyaka chil kawuono pok ukwayo gimoro e nyinga ;kwauru eka tuyudi ,mondo moru ochopi.⁹⁰

Ere ng'ato kuomu man gi osiep ,ma kodhi ire otieno ,kendo wachone ni “osiepna hola makati adek ,nikech osiepna moro owenda koa wuoth ,to aonge gi ma daket e nyime.

To jal manie ot duoke ni “we chanda ,dho ot osechiegi ,to nyithinda gin koda e kitanda ;ok anyal a malo amiyi. Awachonu ni kata ok noa malo omiye nikech osiep ,to nikech mienne noa malo ,kendo miye duto mochando.

Nikech ng'ato ma kwayo yudo ,kendo ng'at ma dwarz yudo ,kendong'at ma dwarz nwang'o ,kendo ng'at ma dwong'o iyawone.⁹¹

Ne nitie jabura moro ma ne ok oluoro Nyasaye ,kendo ne ok odewo ji. To chi liel moro ne e dalano ma ne biro ire pile ,ka wacho ni “ng'adna bura makare kuom jasika”.

Notamre kinde moro ,to bang'e nowacho e chunye niya “kata ok aluoro Nyasaye ,kendo ok adew ji;kata kamano nikech chi lielni chanda ,nang'adne bura makare ,mondo kik ojonya gi biro ira pile .”

To Nyasye donge nong'ad bura makare ni joge moyier ,ma ywakne otieno godiechieng' ? Enodek kuom konyogi koso? Akonu ni nong'ad bura makare piyo . To ka wuod dhano nobi ,nonwang' yie e piny koso ?⁹²

Kulemo kik uthor wacho weche manono ,kaka jo ma ok oyie ,ma paro ni nowinjgi nikech wechegi ng'eny kik ubed kaka joga;nikech wuonu ong'eyo gigo muchando ka pok ukwaye.⁹³

90 Johana 16:24

91 Luka 11:5-10

92 Luka 18:2-8

93 Mathayo6:7,8

Nondik niya “oda enoluong ni od lemo;to un utime bugo mar jomecho.”⁹⁴

To in kilemo,donji e odi maiye ,to kiseloro dho ot, lam wuonu mobet apanda ;to wuonu ma neno apanda nomiyi.

Un to lemuru kama eri “wuonwa manie polo nyngi mondo obed maler ,pinyruodhi mondo obi ,gi modwaro mondo otimre e piny kaka e polo .Imiwa tinende chiembwa ma ndalo duto .Kendo iwenwa gopewa ,kaka wan bende waseweyo ni jogopewa . Kendo kik iterwa kar tem ,ti ireswa kuom ng’ a marachno.

Niekch pinyruoth gi teko gi duong’ ni kuomi higni gi higni ,Amina.⁹⁵

⁹⁴ Mathayo 21:13;Isaiah 56:7

⁹⁵ Mathayo 6:6 ;Mariko 11:24;Johana 15:16,17

MABEYO MANIE POLO

Kaka idwaro mondo ji otimnu e ,un bende timnigi uru kamano. 96

Ne nitie jamoko moro ma ne rwako lewini makwar kod nengini mareprep ,kobedo jamiluma pile. To ng'at modhier moro nyinge Lazaro ,man gi adhonde mang'eny ne iketo piny e dhorangaye . Nogombo mundo oyieng' gi ng'injo molwar e bwo mesa jamokoni to kata guogi bende ne biro nang'o adhondene .
To mos ng'at modhier notho ,kendo malaika moko noting'e motere e kor Ibrahim jamoko bende notho ,kendo noyike.

Ka ne en kar jo motho noting'o wang'e kisande malit ,noneno Ibrahim gi ku mabor ,kod Lazaro ka en go e kore . Nokok kowacho niya "wuonwa Ibrahim ikecha ,ior Lazaro mondo olut lwete e pi ,okuenago lewa ;nikech an gi rem e , ligegani"

Ibrahim nowacho ni "naythina par ni ka ne podi ingima ne inwang'o gigi mabeyo kaka Lazaro ne nwang'o gik maricho;koro to ihyoe kani, to in e rem marach. To bende e kindwa kodu nitie hoho mang'ongo moketi mundo jo ma dwarzalo kalo oa koni iru kik nyal,kendo kik ji ng'ad oa koru obi kani."

Nowacho niya "ka kamano wuonwa asayi mundo iore e od wuonwa ;nikech an gi owetena abich;mondo osiemgi gin bende kik gi bi kar sandni.

Ibrahim nowacho ni "gin gi Musa kod jonabi ber giwinjgi".

To en nowacho ni "ngang' wuonwa Ibrahim ;to ka ng'ato moa kuom jo motho odhiyo irgi,eka ginilokre".

Ibrahim nodwoke niya "ka ok giwinj Musa kod jonabi ,ok giniyie kata ng'ato ochier oa kuom jo motho.97

96 Luka 6:31

97 Luka 16:19-31.

Kuholo jo mugeno ni nochulu kendo ng'a ma nogonu erokamano. Joricho bende holo joricho mondo guyud marom .Ng'ato ka ng'ato ma kwayi gimoro imiye ;to ng'ato mokawo gigi ,kik ikwaye kendo.⁹⁸

Chi liel modhierni obolo moloyo ji duto mobolo kar keno .Nikech jogo duto obolo moko kuom mang'eny ma gin go ;to dhakoni kuom channe obolo ma en go duto ma dokonyorego e ngimane .⁹⁹

Tek ngang' ni jo ma geno mwandu donjo e pinyruodh Nyasaye .Yot ni ngamia kadho e wang' sindano moloyo ramoko donjo e pinyruodh Nyasaye .Kuom ji ok onyalre to kuom Nyasaye onyalre nikech gik moko duto nyalore kuom Nyasaye .¹⁰⁰

Kik uk an mwandu ni ngimau e piny ,ka ma olwende gi nyal kethoe ,to jokuo powo,kende kwaloe .To kanuru mwandu ni ngimau e polo ka ma olwenda kata nyal ok kethoe ,to jokuo bende ok pow kata kwaloe .Nikech ka ma mwanduni ntie e ka ma chunyi bende nobedie .¹⁰¹

Kik utim timbeu makare e nyim ji,mondo gineu ;ka ok urituru kamano uonge pok kuom wuonu me polo .Kichiwo kik igo tung' nyimi kaka jo ma gango wach timo e sunagoke kendo e yore mundo ji omiyi duong' .Adier awachonu giseyudo pokgi ¹⁰²

To in kichiwo kiki lweti koracaham ng'e ma lweti korachwich timo,mondo gi michiwo obed apanda ;to wuoru ma nie polo ma neno apanda nomiyi.¹⁰³

Chiw uru ,eka nochiwni ;por mogik modin,motiel,kendo moo oko ginichiw e koru .Nikech rapor muporogo ema noprnugo kendo. ¹⁰⁴

Jamoko moro ne ntie ma puothe nochiek maber ngang' .Eka noparo e chunye ni "atim ang'o nikech aonge ka ma anyalo kanoe chamba". Kendo nowacho niya "natim kama "namuk derena ,kendo nago moko madongo moloyo to nakan kanyo benda duto kod giga . Eka nawach ni chunya niya "chunya in gi gigi makeyo mang'eny misekano moromo higni mang'eny ;yue ,chiem,methi,bed mamor".

98 Luka 6:34,30

99 Mariko 12:24,25,27

101 Mathayo 6:19-21

102 Mathayo 6:1,2

103 Mathayo 6:3,4

104 Luka 6:38

To Nyasaye nowachone niya “in ifuwo ang’ adwar chunyi otienoni ,to mago ma niiko nodok mag ng’awa ? E kaka obet kuom ng’ato ma choko mwandu ni en owuon ,to ok omew kor ka Nyasaye.

Ere ohala ma ng’ato oyudo konwang’o piny ngima ,to ngimane olalne ? Kata ng’ato nochiw ang’o kar ngimane? 105

105 Luka 12:16-21;Mathayo 16:26

YIE MA SUDO GODE

Kaka yieu obet ,mondo otimrenu.¹⁰⁶

Ji mang'eny nobi moa yor wuok chieng' ,gi yor podho chieng' ,kendo ginibed piny e pinyruodh polo. To jo farisai gi jo sadukai mane paro ni gibiro kuongo donjo e pinyruodh polo to ne ok oyie e ngima gi ok nodonj ngang'.¹⁰⁷

Ka ji ariyo oyie e piny kuom gimoro ma gikwayo ,ginono e ma wuora me polo notimnigi .Nikech ka ma ji ariyo kata adek osechokore e nyinga ,kanyo e ka ma antie e diergi.¹⁰⁸

Ranyisgi jo moyie nobedgo ;ginigol jochiende e nyinga ;giniwuo gi dhok manyien ,gini mak thuonde ,kendo kapo ni gimadho kwiri moro ,ok notimgi malit ngang';giniket lwetgi kuom jo ma tuo mi jo ma tuo noyud ngima .¹⁰⁹

Ka un gi yie ma romo kaka koth karadali unuwach ni godni ni “a kani idhi kacha ,mi noa,kendo onge gimoro ma notami.¹¹⁰

Gigo ma nutue e piny ,notue e polo ,kendo gigo ma unugony e piny ,nogony e polo .¹¹¹

Kik iluor ,yie ayiea. Duto nyalore ni ng'a moyie.¹¹²

106 Mathayo 9:29

107 Mathayo 8:11,12

108 Mathayo 18:19,20

109 Mariko 16:17,18

110 Mathayo 17:20;Mariko 11:24

111 Mathayo 18:18

112 Mariko 5:36;9:23

HORUOK ,KECHO GI NG'WONO.

Ng'at mowene matin ,e ma herane tin.113

Ng'at moro ma jaholo ne ni gi jogope ariyo :achel ne ni gi gowi mar dinari piero apar abich,to machielo ne gi gowi mar dinari piero abich .Ka ne gionge gi ma digichul ,nowegi giduto.Kuom jogo,ere ng'a ma dihere moloyo?

Kuom mano pinyruodh polo operore gi ruoth moro ma ne dwarz timo kweno kod jotichne .Ka nosechako timo kamano ,nokelne ng'at moro man gi gope siling tara gi tara .

To ka ne onge gi ma dochulgo ,ruodhno nochiko mondo ong'iewe ,kod chiege gi nyithinde kaachiel gi gik moko duto ma en go ,mondo gowino orum.

E momiyo jatichno nopolho e tiende mosaye niya “weya mos kendo anachuli duto”.

Mi ruodhe nokeche mogonye ,kendo noweyone gope.

To jatich nogo nowuok nonwang'o jatich wadgi moro,ma ne ni gi gope moromo siling piero apar achiel ;nomake modeye kowacho ni “chul gopi”.

Mi jatich wadgino nopolho mohombe ,ka owacho niya “weya mos ,kendo anachuli duto”

To en ne ok oyie ;nodhi mobole e od tuech nyaka chop ochul gope.

E momiyo ka jotich wadgi noneno gi motimore chunygi ne lit ahinya ,kendo ne gidhi mi ginyiso ruodhggi gigo duto motimore .

Eka ruodhe noluonge ire,nowachone niya “Yaye in jatich marach,naweyoni gowino duto ,nikech nihomba.Ne ok owinjore in bende ikeh jatich wadu ,kaka akechi koso?”

113Luka7:47

114Luka7:41,42

Eka ruodhe notimo mirima ,mokete e lwet josand nyaka chop ochul gope duto.

E kaka Wuora me polo bende notimnu ka ok chuny ng'ato ka ng'ato kuomu we ni wadgi.¹¹⁵

Ok mana nyaka ndalo abiriyo ma inyalo weyo ni wadu ;to nyaka piero abiriyo ndalo abiriyo .Winjri kod ng'at ma rawi ka pod in kode e yo ,dipo ka ng'atno ma rawi oketi e lwet jang'ad bura ,kendo jang'ad bura keti e lwet askari mi boli e od tuech.¹¹⁶

Usewinjo ka nowachu ni “Wang’ kar wang’ kendo lak kar lak”.An to awachonu ni,kik utam ng’at marach ;to ng’atno ma thalo lembi ma korachwich lokne machielo bende .Ng’ato madwaro donjoni mondo okaw akochi ,wene arochi bende.

To ng’atno ma chuni ni idhi kode wuodh gweng’ achiel ,kowe wuodh gweng’ ariyo. Ng’ato ma kwayi gimoro ,miye ,to ng’ato ma dwarz holo kuomi kik ilokne ng’eyi.¹¹⁷

Kuchung’ kulemo ka un gi wach gi ng’ato weneuru ,mondo Wuonu me polo bende owenu richou.E momiyo kichiwo chiwo mari e kar misango to kanyo iparo ka owadu ni gi wach moro kodi we chiwo mari kanyono e nyim kar misango ,idog ithegri gi owadu mokuongo eka ibi ichiw chiwo ,mari.¹¹⁸

Ka uweyo ni ji richogi ,un bende Wuonu me polo nowenu.¹¹⁹

¹¹⁵Mathayo18:23-35

¹¹⁶Mathayo18:22;5:25

¹¹⁷Mathayo5:38-42

¹¹⁸Mariko11:25;5:23,24

¹¹⁹Mathayo6:14

NGIMA MANYAGO OLEMO

Olembgi e ma unung'egigo.¹²⁰

Un e kat piny .To kado ka ndhadhune orumo noyud ndhadhu nadi?Ok onyal gimoro ,to iwitogo mana oko ,mi ji nyone.

Ji pono mizabibu e yadh kudho koso ,kata ng'owo kuom oriang'?E kaka yien mabeyo duto nyago mana olemo mabeyo,to yien maricho nyago mana olemo maricho .Yath maber ok nyal nyago olemo maricho ,kata yath marach ok nyal nyago olemo mabeyo.Yien duto ma ok nyag olemo mabeyo ing'adogi oko,kendo iwitogi e mach.

To olembgi e ma unung'egigo.¹²¹

Ng'ato ne ni gi ng'owo mopidho e puoth mizabibu mare ;kendo nobiro kodwaro olemo kuome to ne ok onwang'o .Nowacho ni jalos puoth mizabibu niya "koro higni adekgi asebiro kadwaro olemo kuom ng'owoni to ok anwang' .Ng'ade oko ,marang'o oketho lowo?"

En nodwoke niya "ruoth weye higani bende ,nyaka nadoye,kendo nalose gi owuoyo .Eka mos konyak ,ber ;to ka ok onyagi,ning'ade oko.¹²²

Ma eri e mimiyogo Wuora duong' .ni unyago olemo mang'eny,kendo unubed jopujrena .Ng'at maber golo gik mabeyo e mwandune maber,kendo ng'at marach golo gik maricho e mwandune marach.¹²³

Jachuoyo nowuok mondo ochuo .To ka noyudo ochuoyo,kodhi moko nolwar e dir yo ,mi winy nobiro mochamogi.Moko nolwar e kuonde motimo lwanda ,ka ma lowo operoree ;motwi piyo nikech lowo ne ok tut .Ka ne chieng' owuok ne giwang,to nikech ne gionge tiendegi'ne gituo.Moko nolwar e kudho ,to kudhogo notwi mothung'ogi.

Moko nolwar e lowo maber monyak,moko piero apar achiel,moko piero auchiel,moko piero adek.

120Mathayo7:16

121Mathayo5:13;7:17-20

122Luka13:6-9

123Johana15:8;Mathayo12:35

Ng'ato ka ng'ato ma owinjo wach pinyruoth to ok odonjone ,Ng'a ma rachno biro kendo maye gi mochuo e chunye ,jali e machal gi kodhi mochuo e dir yo .
To ng'a mochuo e kuonde lwanda ma lowo operoree ,jali e en ma owinjo wach kendo gikanyono orwako gi mor ,To oonge tielo e iye ,mi obet mana ndalo manok ;eka ka chandruok kata sand biro nikech wach,gikanyono ochwanyre.
Ng'at mochuo e kudho ,jali e en ma owinjo wach eka parruok mar piny kod wuond mar mwandu thung'o wach mi ok onyak.

Ng'a mochuo e lowo maber ,jali e en ma owinjo wach to odonjone ;en to onyak ,kendo onywol,moro piero apar achiel,moro piero auchiel,moro piero adek.124

124Mathayo13:3-8,18-23

NGIMA KOD CHANG MAR DEL KOD RINGRE

Jo mangima ok dwar jathieth,mak man jo ma tuo.¹²⁵

Dhiuru upuonjru tiend wachni eri “ng’wono ema adwaro to ok misango”.Nikech ne ok abiro mondo aluong jomakare ,to mana joricho,Jogo ma satan otweyo ok onego gony koso?¹²⁶

Ere mayot?Wacho ni “richoni oweni?”kata wacho ni “chung’i iwuothi ?”To mondo ung’e ni Wuod dhano ni gi teko e piny mar weyo ni ji richo nowacho ni jaatheny ni “Chung’i iting’ kitandani ,idhi odi”.¹²⁷

Ere ng’ato kuomu man gi rombe piero apar achiel ,ma ka achiel kuomgi olal.to ok dowe piero ongachel gi ongachelgo e thim kendo odhi odwar mano molal nyaka onwang’e ?Eka kosenwang’e okete e goke komor.Kendo kosedok dala ,oluongo osiepene kod jogweng’ kowachonigi niya “moruru koda nikech asenwang’o rombona ma nolal.”

Akonu niya ,kamano bende mor nobedi e polo kuom jaricho achiel molokore ,moloyo kuom ji mabeyo piero ongachel gi ongachel ma ok dwar lokruok.¹²⁸

Ere dhako man gi fedha apar ma ka fedha achiel olalne ,ok do mok taya kendo yweyo ot,kendo manyo gi kinda nyaka onwang’e?

To kosenwang’e ,oluongo osiepene kod jogweng’ kowachonigi ni “moruru asenwang’o fedha no ma nolalna .

Akonu ni ,kamano bende e kaka mor nitie e nyim malaika mag Nyasaye kuom jaricho achiel molokore.¹²⁹

¹²⁵Mathayo9:12,13;Hosea6:6;Luka13:16

¹²⁶Mathayo9:12,13;Hosea6:6;Luka13:16

¹²⁷Mathayo9:5,6;8:13;Luka8:48

¹²⁸Luka15:4-7

¹²⁹Luka15:8-10

MIGAWO MAR ANG'WEN

LUONG E NGIMA MANYIEN

LUONG

Un ne ok uyiera ,to an nayierou,kendo nawalou mondo un udhi unyag olemo,kendo mondo olembu osiki.¹³⁰

Ng'ato ne nigi yawuote ariyo .To nonyiso wuowi maduong' ni “wuoda dhi kawuono iti e puotha mar mizabibu”

Wuowi maduong' no duoke ni “ok an adhi”to bang'e kendo no loko pache bu odhiyo tiyo e puodho.

Kendo nodhi onyiso wuode matin ni “dhi kawuono in bende iti e puotha mar mizabibu..To wuode matin noduoke ni “abiro timo kamano” to odong' e dala ma ok otimo dwach wuon mare .

Kuom yawuoyi ariyo gi mane mano timo dwach wuon mare?

Ang'o momiyo iluonga ni maber ?Onge ng'a maber mak mana Nyasaye kende .Ing'eyo chik :kik ineki,kik iterri,kik ikwel,kik ihangi ,kik igang wach,mi wuoru gi meru duong'.Tim magi to ibiro yudo pok maber e polo .Podi irem ka imiya duong' mana gi weche mag dhogi kende to ok imiya duong' gi gigi duto ma en mwandu to kod ngimani to gi konyo jogo ma ongo go.¹³¹

Ng'a ma dwaro luwa ,mondo okwerre owuon,kendo oting' msalape ,eka oluwa.Nikech ng'a ma dwaro reso ngimane ,ngimane enolalne ;to ng'a ma ngimane olal nikech an ,enonwang'e.¹³²

Ruoth moro noloso kisera ni wuode ,Nooro jotichne mondo giluong jogo moluongi e kisera ,to jogo ne ok dwar biroe.

Ne ok gidewo ,mi gi dhi adhia ,ng'at moro e puothe owuon to ng'at moro e ohande,to jo moko nomako jotichne ,notimonigi malit,monegogi.

¹³⁰Johana15:16

¹³¹Mariko10:18-22

¹³²Mathayo16:24,25

Ruodhno notimo mirima ;kendo nooro askeche ,motieko jonekgo ,kendo owang'o dalagi.

Eka nowacho ni jotichne niya “Kisera koro oikore ,to ma noluongi ne ok owinjorego.E momiyo dhiuru e akek yore ,to jo manadi munwang'o luonguru obi e kisera.

Jotichgo nowuok ,modhi e yore ,kendo nochoko ji duto ma ne ginwang'o ,jo maricho kod mabeyo bende ;kendo od kisera nopong' gi welo.

Ka ruoth nobiro mondo orang wende noneno ng'at moro kuro ma ok orawakre gi law kisera ,mi nowachone ni “omera ,a idonjo nadi ka eri kionge law kisera ?to dhoge nomoko.

Eka ruoth nowacho ni jotich niya,Tueuru tiendene gi luetene uwite oko e mudho mandiwa;kanyo ywagruok nobedie gi muodo lak.

Nimar jo miluongo ng'eny to jo miyiero nok .Ogik kare ,kendo pinyruodh Nyasaye chiegni;lokuru chunyu,kendo yieuru kuom wach maber.¹³³

Onge ng'a manyalo biro ira ma ok Wuoro ma noora e moywaye ;kendo an nachiere chieng' giko.Duto ma Wuoro omiya ,nobi ira;kendo ng'a ma biro ira ok nawite oko ngang'.¹³⁴

Donjuru e rangach madiny;nikech rangano duong',kendo yorno lach ma dhi e kethruok,kendo ging'eny ma donjoe.To rangano tin ,kendo yorno diny ma dhi e ngima,kendo ginok ma nwang'e.Keduru mondo udonji e dho ot madiny ;nikech akonu ni ji mang'eny nodwar to ok gininal.

¹³³Mathayo22:2-14;Mariko1:15;Johana15:19

¹³⁴Johana6:44,37

¹³⁵Johana1:50

¹³⁶Mathayo7:13,14;Luka13:24

WACH E WI NYWOL MANYIEN

Kiki iwuor nikech awachoni ni “onego onywolu nywol manyien.¹³⁷

Adier adier ,awachoni,ka ok onywo ng’ato nywol manyien,ok onyal neno pinyruodh Nyasaye .Ka ng’ato ok onywol gi pi kendo gi Roho ,ok onyal donjo e pinyruodh Nyasaye .¹³⁸

Gi ma ringruok onywolo en ringruok kendo gi ma roho onywolo en roho.Yamo kudho ku mohero kendo iwinjo dwonde ,to ikiya ka moae kata ku modhiyoe;e kaka obedo kuom ng’ato ma roho onywolo.¹³⁹

Onge ng’ a ma keto rabaw manyien kuom law moti;nikech rabaw manyien jowo lawno ,mi omedo yiech marach moloyo.Bende ji ok ol divai manyien e ndede ma piene otı ;kotim kamano to ndedego yiech ,mi divai pukore,kendo ndede kethore.To ji olo divai manyien e ndede ma piene nyien ,kendo ikungogi duto.¹⁴⁰

In japujonj mar Israel to magi ok donjni koso?Kawachonu me piny to ok uyie,unuyie nadi kawachonu me polo?¹⁴¹

Nyasaye ne ok ooro Wuwi obi e piny,mondo ong’ad ni piny bura,to mondo piny onwang’warruok kuome.Ng’ a ma yie kuome bura ok oloye;ng’ a ma ok oyie ,bura oseloye,nikech ok oyie kuom nying Wuwi ma miderma mar Nyasaye.¹⁴²

An e chier ,kendo an e ngima.Ng’ a ma yie kuoma ,kata otho nodok mangima;kendo ng’at mangima,koyie kuoma,ok notho nyaka chieng’ .Kiyie nine duong’ mar Nyasaye.¹⁴³

137Johana3:7

138Johana3:3,5

139Johana3:6’8

140Mathayo9:16,17

141Johana3:10,12

142Johana3:17,18

143Johana11:25,26,40

Chiemba en timo dwarz mar jal ma noora kendo tieko tichne .Ma eri e tich ma Nyasaye dwarz, uye kuom jal ma nooro.¹⁴⁴

Ng'ato moro ne gi yawuote ariyo .wuowi ma chogo nowacho ni wuon ni “Wuora pogna pok mar gikeno ma kora”.mi nopogonigi gige.

Bang' ndalo manok wuowi machogono nochoko gige duto ,oloko pesa nodhiyo e piny mabor kendo kanyo nowito gige kobet achach.Ka nosetieko duto ,kech maduong' nowuok e pinyno,kendo wuowino nochako bedo ng'a mochando.

Eka nodhiyo modak kod japyyno moro ,ma noore a lege ni mondo okwa mbithe .Nogombo ni mondo ocham pokla ma mbithe chamo ;kendo onge ng'ato ma nomiye gimoro.To ka ne parone oduogo nowacho niya “Nitie jotich adi mag wuora man gi moromogi kendo moloyo ,to an kech nega ka! Nachung' nadhi ka wuora ,na wachne ni “aseketho nyim polo kendo nyimi;ok awinjora koro mondo iluonga ni wuodi;keta ka ng'at achiel kuom jotichni.”

Nochungo ,nodhiyo ka wuon mare .Ka ne pod en gi ku mabor ,wuon mare nonene mong'wonone ;noringo nokwako toke ,monyodhe.

Wuode nowachone niya “Wuora aseketho nyim polo kendo nyimi;ok awinjora koro mondo iluonga wuodi.”

To wuon nowacho ni misumbe ni “Goluru piyo law maber moloyo,urwakego;kendo keturu biny e lith lwete ,gi wuache e tiende ,kendo keluru nyarwath mamiyono ,yang'euru ,wachiem kendo wamor.Yandi olal ,to koro onwang'e .Eka gichako mor.

To wuode maduong' ne ni e puodho;kendo ka nobiro mosudo machiegni gi ot,nowinjo dwond thum gi tugo.Noluongo achiel kuom jotich mopenje ni wechegi obet nang'o.

Nowachone ni “owadu osebiro ,kendo wuoru oseyang'o nyarwath mamiyo ,nikech oseyudo kongima”.

To mirima nomake nodagi donjo .Eka wuon mare nowuok ,nohombe.

To en nodwoko wuon mare niya “higni mathoth gi asetiyoni kaka misumba kendo pok aketho chikni kata dichiel;to pok imiya kata nyadiel mondo amorgo gi osiepena.

¹⁴⁴ Johana4:34;6:39

To ka wuodini obiro ,ma nochamo gigi gi jo ma terore ,iseyang'one nyarwath mamiyono.

Nokone niya “nyathina ,ndalo duto in koda ,to giga duto gin meki.To owinjore wamor kendo wail,nikech owaduni yandi otho,to koro ongima;yandi olal ,to koro onwang’e.¹⁴⁵

Ka ok ulokru ,kendo udok kaka nyithindo matindo,ok,unudonj e pinyruodh polo ngang’ .Wuod dhano nobiro mondo ores jo molal.Ok en dwaro mar Wuonu me polo ni achiel kuom jo matindogi olal.¹⁴⁶

Nikech Nyasaye nohero piny ahinya ,omiyo nochiwuode ma miderma ,mondo ng’ a ma oyie kuome kik lal,to obed gi ngima mochwere. Bende iyie kuoma?”¹⁴⁷

¹⁴⁵Luka15:11-32

¹⁴⁶Mathayo18:3,11,14

¹⁴⁷Johana3:16;11:26

JOPUONJRE GI JOTICH

Onge ng'ato ma nyalo tiyo ni ruodhi ariyo,nikech enosin gi moro kendo noher machielo,kata nopadre kuom moro kendo nochal machielo.Ok unyal tiyo ni Nyasaye kendo ni mwandu.¹⁴⁸

Ere ng'ato kuomu ma dwarz gero ohinga ,ma ok bed piny mondi ,kendo okwan nengo,mondo one ka en kod ma dotiekego?Miti kosekunyo mise ,kendo ok onyal tieko ,to ji duto ma nenogo chako nyiere ka giwacho niya “jali nochako gedo to notame tieko.”

Ere ruoth ,ma dhi keto gi ruoth machielo,ma ok nobed piny mondi,kendo nono wach,ka ji gana apar ma en go nyal romogom kod ng'atno ma birokedo kode gi ji gana pier ariyo?Ka ok onyal to ooro joote ka pod ruoth machielo ni ku mabor ,mondo okwaye giki monego kel kuwe.

Kamano bende ng'ato ka ng'ato kuomu .ka ok oweyo gige duto ,ok onyal bedo japuonjrena.¹⁴⁹

Ng'at ma jadier kuom gi matin ruok obedo ma jadier kuom gi maduong'bende;ng'at ma ok jadier kuom gi matin,ok bed ma jadier kuom gi maduong' bende ,kendo ka ne ok usebedo jo adier kuom gir ng'ato moro ng'a ma nomiu giu uwegi?¹⁵⁰

Aorou kaka rombe e dier ondiegi;e momiyo beduru mariek ka thuonde ,kendo modembore kaka akuche.¹⁵¹

Ung'eyo ni jogo mikwano ka ruodhi mag ogendni tiyo gi loch kuomgi,kendo jodonggi chikogi gi teko,Kuomu ok en kamano;to ng'a madwarz doko jaduong' kuomu ,nobed jatichu;kendo ng'a ma dwarz bedo jatelo kuomu ,nobed misumba jo duto.

¹⁴⁸Mathayo6:24

¹⁴⁹Luka14:28-33

¹⁵⁰Luka16:10-12

¹⁵¹Mathayo10:16

Nikech kata Wuod dhano ne ok obiro mondo otine to mondo oti,kendo ochiw ngimane odik rawar ni ji mang'eny.¹⁵²

Un kusiko e wachna ,eka unubed jopuonjrena adier.

Jondikogi jo Farisai bet e kom Musa. E momiyo gigo duto ma giwacho mundo urit,rituru kendo timuru .To kik utim kaka gitimo ,nikech giwacho to ok gitim. Gi tueyo ting' mapek ma tamo ji ting'o kendo gi ketogi e gok ji;to gin giwegi ok gidwar mulogi,kata gi lith lwetgi.Timbegi duto gitimo ni mondo ginere e nyim ji ;nikech gitueyo migelni malach ,kendo gimedo usi momin e riak leppi ,kendo gihero kuonde bet moyiedhi e chiemo,kod kombe manyime e sunagoke,gi ji oluonggi ni Rabii,nikech ng'at achiel e japuonju to un duto un owete.

Kik iluong ng'ato ni wuonu e piny ka ;nikech ng'at achiel e wuonu ,manie polo.Bende kik luongu ni jotelo ;nikech jatendu en ng'at achiel,ma en Kristo.Ng'atno moloyou gi duong' enobed jatichu .Ng'atno ma oting're malo owuon nodwoke piny;to ng'atno ma nodwokre piny owuon ,noting'e malo.¹⁵³

To ka wuod dhano nobi e duong'ne maler gi malaika duto kode ,nobed e kom duong'ne maler ,kendo ogendni duto nochokre e nyime eka nopoggi jogi kod jogi,kaka jakwath pogo rombe kod diek. Mi noket rombe e bade korachwich,to diek e bade koracham.

Eka ruoth nowach ni jogo manie bade korachwich niya “biuru un jo moguedhi mag wuora,,chamuru gikeni mar pinyruodh polo moiknu nyaka a chakruok piny.nimar nadenyo kendo numiya chiemo;riyo noloya to numiya modho,ne an wendo ,to nurwaka ;ne an duk to numiya lewini,natuo to nulima,ne an e od tuech,to nubiro ira.

Eka makarego nodwoke niya “ruoth ne waneni kidenyo karang'omi wamiyi chiemo,kata ka riyo oloyi mi ne wamiyi modho?Ne waneni ka in wendo karang'o mi warwaki ,kata ka in duk mi ne wamiyi lewini?Ne waneni kituo,kata e od tuech karang'o,mi wabiro iri?

Eka noduokgi niya “adier awachonu ni kaka nutimo ni ng'at achiel matinie moloyo kuom owetenagi ,e kaka nutimona.”

Eka nowach bende ni jo manie bade koracham niya “ayeuru kuoma ,un jo mokwedi ,udhi e mach ma nyaka chieng' moik ni satan kod malaika mage.

Nimar nadenyo to ne ok umiya chiemo;riyo noloya ,to ne ok umiya modho;ne an wendo to ne ok urwaka;ne an duk to ne ok umiya lewini ;natuo kendo ne an e od tuech ,to ne ok ulima.

Eka gin bende ginidwoke niya ‘ruoth na waneni kidenyo karang'o,kata ka riyo oloyi kata ka in wendo ,kata duk,kata kituo,kata e od tuech,to ne ok wakonyi?

152Mariko10:42-45;Johana13:17

153Johana8:31;Mathayo23:2-12

Eka enodwokgi niya “adier awachonu ni ,ka ok nutimo kamano ni ng’at achiel kuom jo matindogi moloyo ok nutimona.”

To jogi noa;nodhi e buru mochwere ;to jo makare nodhi e ngima mochwere.¹⁵⁴

Un uluonga ni ‘japuonj’,kendo ni ‘Ruoth’;mano uwacho kare nikech e an . To ka an ruoth kendo japuonj ,to alwoko tiendu,un bende utim kaka atimonu.¹⁵⁵

154Mathayo25:31-46

155Johana13:13-15

OTE MADUONG'

We jomotho oyik jogi motho;to in.idhi iland wach pinyruodh Nyasaye .156

Keyo duong',to jotich ema nok.Emomiyo kwauru wuon keyo mondo oor jotich odhi e keyone. Ng'ato mosemako kwe dhiang' gi lwete ,kendo chako ng'iyo chien ,ok owinjore gi pinyruodh Nyasaye .157

Ng'at mayie kuoma ,tije matimo ,en bende notim;kendo notim tije madongo moloyo magi nikech adhi ka wuora ;kendo gi ma nukwa e nyinga ,natim mondoomi wuoro duong'kuom wuowi .Ng'ato ma tiyona ,mondo oluwa ;kendo an ka ma antie ,jatichna bende nobed kanyo.ng'ato ma tiyo na e ma Wuoro nomi duong'.158

Yaluru niya ,“pinyruodh polo osesudo machiegni”.Changuru jo ma tuo ,chieruru jo motho puodhuru jodhoho,goluru jochiende. Useyudo nono ,chiwuru nono.159

Ng'ato ma ok ni koda en jasika ;kendo ng'ato ma ok chok kaachel koda en ng'a ma keyo.160

Ot mudonjoe ,wachuru mokuongo ni “kuwe obed e odni”,ka ng'at kuwe ni e odno ,kuweu nobed kuome ;to ka ng'at kuwe ongee ,eka kuweu nodognu.

To beduru mana e odno,kuchamo kendo madho gi ma gimiyoo ,nikech jatich owinjore gi pokne.161

Ng'a ma rwako ng'at ma an aoro e ma rwaka ;kendo en e ma,rwako Jal ma noora.

156Luka9:60

157Luka10:2;9:62

158Johana14:12;12:26

159Mathayo10:7,8

160Matahayo12:30

161Luka10:5-7

Ritreueru ni ji;nikech giniteru e buchegi kendo ginichwadu e sunagokegi,kendo noteru e nyim joloch gi ruodhi nikelch an,mondo udoknigi joneno ,kendo ni jo ma ok jo Yahudi .To ka gimakou ,kik uparru kaka unuwachi,kata kuom gima unuwachi,nikech gi ma duwachi nomiu e sano;nimar ok en un ema uwuoyo ,to Roho mar Wuonu ema nowuo gi dhou.
Paruru wachno ma nawachonu ni “misumba ok duong’ moloyo ruodhe”. Ka gisanda ,un bende gnisandu;ka gisemako wachna,un bende ginimak wachu. To magi duto ginitimnu nikelch gikiya Jal ma noora.¹⁶³

Ka di ne ok abiro kendo wacho kodgi,da ok gibet gi richo;to koro gionge gi wach ma umo richogi.Ng’ a ma sin koda,osin kod Wuora bende.Ka di ne ok atimoe diergi tijego ma ng’at moro pok otimo ,da ok gibet gi richo ;to koro gisenenogi ,kendo gi sin koda,kendo gi wuora bende ,To ma timore mondo wach ma nondiki niya “Ne gisin koda kayiem”.¹⁶⁴

Nabiro bolo mach e piny ;to madi koro bed ni osemoko,kendo oliel! Ugalo ka nabiro mondo ami piny kuwe koso?Awachonu ni,ooyo to mondo pogruok obedie .Nikelch nyaka a ndalogi ji abich nobed e ot achiel ka gipogore ,ji adek kod ji ariyo ,kendo ji ariyo kod ji adek.¹⁶⁵

Ka gisandou e dala moro ,ringuru udhi e machielo;nikech adier awachonu ni ,ok unutiek limo mier duto mag Israel .ka pok Wuod dhano obiro.Kendo ng’at ma ok norwaku kata winjo wecheu,kuwuok e odno kata e dalano,teng’uru buru me tiendeu .Adier awachonu niya,nodok mandhandham ni piny Sodom gi Gomorra chieng’ bura moloyo dalano.¹⁶⁶

Ka da un mag piny, piny ohero mage owuon.To nikelch ok un mag piny, e momiyo piny sin kodu.¹⁶⁷

¹⁶²Johan13:20

¹⁶³Mathayo10:17-20

¹⁶⁴Johana15:22-25;Zaburi35:19

¹⁶⁵Luka12:49-53;Mathayo10:21

¹⁶⁶Mathayo10:23,14,15;Johana15:18

¹⁶⁷Johana15:19

Wechegi asewachonu mondo ubed gi kuwe kuoma;e piny uneno malit;to timuru
chir!An aseloyo piny.¹⁶⁸

168 Johana16:33

LEMO YESU KRISTO NI JOPUONJRERNE

Wuora osechopo ;imi Wuodi duong' mondo nimiye teko kuom ji duto mundo omi jjiduto ma nimiye ngima mochwere.¹⁶⁹

Mani e ngima mochwere ,ni ging'eyi ,in Nyasaye makende maradier ,kod jal ma nioro ,Yesu Kristo .An asemiyi duong' e piny ,asetieko tich ma nimiya ni mondo atim.To koro ,A wuora ,miya duong' ka ma intie iwuon ,duong' ma ne an go kodi ka ne piny ok obetie .Nyingi nanyiso jogo ma nimiya e piny .Ne gin jogi kendo nimiyagi ,kendo gisemako wachni.koro ging'eyo ni gik moko duto ma nimiya oa kuomi.Nikech weche ma nimiya asemiyogi ,kendo giserwakogi kendo ging'eyo adier ni naa kuomi,kendo giseyie ni in e ma niora.

An akwayonigi ,ok akwayo ni piny .to akwayo ni jo ma nimiya ,nikech gin jogi,kendo maga duto magi,kendo magi maga.Koro ok an e piny ka kendo ,to gin e piny .Ka kendo an abiro iri.Wuoro maler ,iritgi gin nyingi ma nimiya,mondo gibed achiel kaka wan achiel.

Ka yandi an kodgi an naritogi mang'won ,kendo kuomgi onge ng'a molal ,mak mana wuod lalno ,mondo wach ochopi kaka nondiki.To an koro abiro iri ;kendo wechegi awacho e piny ,mondo gibed gi morna,kendo morna oromgi chuth.

An asemiyogi wachna ;kendo piny osesin kodgi,nikech ok gin mag piny,kaka an ok an mar piny.Ok akwayo ni igolgi e piny ,to ni iritgi kuom ng'a marachno.Ok gin mag piny,kaka an ok an mar piny.Puodhgi e adieran .Wachni en adiera.

Kaka niora e piny,e kaka an bende naorogi e piny ,kendo an awalora awuon nikech gin,mondo gin bende awalgi e adiera .Ok akwa ni jogi kende ,to akwayo bende ni jogo ma yie kuoma nikech wachgi;mondo giduto gibed achiel,kaka in Wuora in e iya ,kendo an bende an i e iyi ,mondo gin bende gibedi e iwa;mondo piny oyie ni in e ma niora.

¹⁶⁹ Johana 17:1-26

An namiyogi duong' ma ne imiya ,mondo gibed achiel ,kaka wan achiel;an e igi,kendo in e iya mondo omigi bet achiel chuth;mondo piny ong'e ni niora,kendo niherogi kaka nihera.

Wuora adwaro mundo jogo mimiya ,gin bende gibed koda ka ma antie ,mondo gine duong' na ma nimiya ,nikech nihera ka pok ochak chue piny.

Wuora makare ;piny ne ok ong'eyo ,to an nang'eyo ni in e ma niora.Nanyisogi nyingi ,kendo nanyisogi mondo herano miherago obed e igi,an bende abed e igi.¹⁷⁰

¹⁷⁰Johana17:1-26

MIGAWO MAR ABICH

SINGO

TIENG' MA SANI

Ng'ato ma wiye okuodi koda ,kendo kod wechena e tieng'ni ma terore kendo makethore Wuod dhano bende wiye nokuodi kod ng'atno,ka nobi e duong' maler mar Wuon mare kaachiel gi malaika maler.¹⁷¹

Tieng' marach kendo materore gombo ranyis to ranyis ok enomigi mak mana ranyis janabi Jona.Nikech kaka Jona nobedo e i rech mang'ongo ndalo adek odiechieng' gi otieno,e kaka Wuod dhano nobedi e i piny ndalo adek odiechieng' gi otieno.Jo Nineve biro chung' kod tieng'ni ,kendo giniketgi bura;nikech gin ne gilokre kuom yalo mar Jona,to ka eri nitie ng'a maduong' moloyo Jona.

Ruoth madhako mar milambo biro chung' e chieng' bura kod tieng'ni ,kendo noketnigi bura ;nikech noa e tung' piny mondo owinj rieko mar Solomon,to ka eri nitie ng'a moloyo Solomon.¹⁷²

To anapor tieng'ni gang'o?Ochalo gi nyithindo mobet e chiro,kendo luongo jowadgi,ka giwacho niya,ne wagoyonu thum ,to ne ok umiel,ne wagoyo nduru to ne ok uywak.

Johana nobiro ka,ok ochiem kata metho ,kendo giwacho ni "jachien ni kode".Wuod dhano to nobiro ka chiemo kendo metho ,kendo giwacho niya "Nee jawuoro ,kendo jamadh divai,osiep josol osuru gi joricho."To rieko nyisore ni en kare kuom tichne.¹⁷³

Yaye nyithind thuonde ,unyalo wacho nadi weche mabeyo kuricho?Nikech mogundho e chuny ema dhok wacho.¹⁷⁴

Godhiambo uwacho ni "kiny piny nobed molendo nikech polo kwar".Kendo gokinyi uwacho ni tinende yamo ang' nokudhi,nikech polo kwar kendo piny otimo lwoch. Ulony e ng'eyo ranyisi mag ndalogi to ok unyal ng'eyo koso?

¹⁷¹Mariko8:38

¹⁷²Mathayo12:39-42

¹⁷³Mathayo11:16-19

174 Mathayo 12:34

175 Mathayo 16:2,3

Biuru ira ,un jo mojony kendo mogangoru mapek to anamiu yueyo .Rwakuru lota kuomu kendo puonjreuru kuoma nikech amuol kendo adembora e chuny,to unubed gi kwe e chuny .Nikech lota yom kendo ting'na yot.176

Un muselwa ,chieng' chuech manyien ka wuod dhano ,nobed e kom duong'ne un bende unubed e kombe apar gariyo mag Israel.

176 Mathayo 11:28-30

177 Mathayo 19:28

KA MOLOSNU

Adhi mondo alosnu kar bet.

Uyie kuom Nyasaye an bende yieuru kuoma .E dala wuora nitie udi mang'eny.Ka da ni ok kamano ,di ne ok awachonu,nikech adhi mondo alosnu kar bet.To ka adhi malosonu kar bet anbi kendo eka narwaku ka ma antie,mondo ka ma antie an ,un bende ubedie.¹⁷⁹

Upenjoru kuom wach ma nawacho ni “pod matin ;eka ok ununene ?Unuywagi,unugo nduru,to piny nomor;unubed mokuyo ,to kuyo maru nolokre mor.¹⁸⁰

Ka dhako muoch kayo,en gi kuyo nikech sa nyuol;to kosenwolo nyathi koro ok opar rem kendo,nikech omor ni dhano onywol e piny.Un bende koro un gi kuyo ,to naneu kendo,eka chunyu nomor,kendo onge ng’ato ma nomau mor maru.¹⁸¹

178Johana 14:2

179Johana14:1-3

180 Johana16:19,20

181Johana16:21,22

SINGO E WI BIRO ROHO MALER

Chuny e ma kelo ngima.¹⁸²

Kuhera unumak chikna ,kendo anakwa Wuoro kendio nomiu jakony machielo,mondo osik kodu nyaka chieng' ,en Roho mar adiera ;ma piny ok nyal rwako nikech ok onene ,kendo okiyae .Un to ung'eye nikech osiko kodu kendo obedo e iu.¹⁸³

Ok an aweu ka nyithi kiye ;anabi iru kata kamano awachonu adiera ni:bernu kaa nikech ka ok aa,jakony cha ok nobi iru to ka adhi naore iru.

Roho adoerano kosebiro ,en notelnu e adiera duto;nikech ok nowuo gi tekone owuon ,to weche duto mowinjo e ma nowacho kendo nohulnu weche mabiro timore.¹⁸⁴

En nomiya duong' nokech nokaw kuom maga kendo nonyisu .Duto ma wuoro nigo gin maga ,e momiyo nawacho ni okawo kuom maga kendo nonyisu.¹⁸⁵

Ka wuodi okwayi kuon to dimiye kidi?Kata kokwayi rech ,dimiye thuol karrech koso?Kata ka okwayi tong' gweno ,dimiye okela koso?
Ka un jo amricho ung'eyo miyo nyithindu mich mabeyo,wuoru me polo ok nochiw mokadho Roho maler ni jogo makwaye koso?

To ka jakony obiro ,ma noornu oa kuom Wuoro en roho mar adiera moa kuom Wuoro ,en nobed janeno kuoma.¹⁸⁷

182 Johana 6:63

183 Johana14:15-17

184Johana 14:18;16:7-13

185 Johana16:14,15

186Luka 11:11-13

187 Johana 15:26;14:26

LUONG E NGIMA MOCHWERE.

Ng'at moyie kuom wuowi nobed gi ngima mochwere.¹⁸⁸

Ng'ato moro noloso chiemo mathoth ,kendo noluongo ji mang'eny .E sa mar chiemo nooro jatichne mondo owach ni ji moluong ni “bi uru nikech gik moko ose ikore.” To giduto kar rombgi ne gichako wacho weche manono ,ka gikwayo wuon chiemo mondo owegi.Ng'at mokwongo nowachone ni “aseng'iewo puodho ,onego adhi anene;akwayi mondo iweya.”

Kendo ng'at machielo nowacho ni “aseng'iewo dhok moruowo tieng’ abich to adhi tenogi;akwayi mondo iweya”

Ng'at moro nowacho ni “asekendo nyako w momiyo ok anyal biro”

Jatichno nobiro monyiso ruodhe wechegi .Eka mirima nomak jaduong’ ot,nowacho ni jatichne niya “wuogi piyo e yore gi ndeche mag dala ,kendo ikel keni jomodhier gi rong’onde gi muofni gi pudhe .”

Eka jatijno nowacho niya “Ruoth gi ma ichiko oselim ,to pod kinde nitie”.

Ruoth nowacho ni jatijno ni “wuogi idhi e ndeche gi puothe ,ichikgi kichunogi gidonji ,mondo oda opong’ .Nikech akonu niya “kuom ji ma noluungi onge ng’ato ma nobil chiemba”.¹⁸⁹

Ng'a ma winjo wachna ,kendo yie kuom Jal ma noora en gi ngima mochwere ,kendo ok odhi e bura ,to osea e tho ,kendo osedonjo e ngima .Ndalo biro ,kendo osechopo ma jomothro nowinj dwond Wuod Nyasaye ;kendo mowinjo ginidok mangima .Kik iwuor wachni ,nikech ndalo biro ma i duto manie liete nowinj dwonde ,kendo giniwuog oko;jo ma notimo maber nochier e ngima ,to jo ma notimo maricho nochier e bura.¹⁹⁰

Mani e ngima mochwere ,ni ging’eyi,in Nyasaye makende maradier ,kod Jal ma nioro Yesu Kristo .Nikech Nyasaye nohero piny ahinya omiyo nochivo wuode ma miderma mondo ng'a ma oyie kuome kik la ,to obed gi ngima kendo ngima mochwere.

188Johana 3:16

189 Luka 14:16-24

190 Johana 5:24,25,28,29.

Kendo wach maber mar pinyruoth nolandre e pinje duto ,mondo obed ranyis ni ongendni duto ,eka giko nobi.¹⁹¹

191 Johana 17:3;3:16;Mathayo24:14

NDALO GIKO

Adier awachonu niya,tieng'ni ok norum ngang' ka pok magi duto otimore.¹⁹²

Ne nitie ng'at moro ma wuon pacho ,ma noidho mizabibu e puothe ,mochielogo ,mokunyoe kar biyo mizabibu,mogero katandalo;eka nosinge ni jopur ,mi nodhi wuoth.

Ka ne ndalo chiek olemo chiegni nooro jotichne ir jopur mondo ginwang' olembene,to jopurgo nomako jotichne ,kendo ne gigoyo achiel ,to machielo ne ginego ,kendo moro ne gigoyo gi kite.

Kendo nooro jotichne moko mang'eny moloyo ji mokuongo ;mi ne gitimonigi kamano.

Bang'e nooro wuode irgi,kowacho niya "giniluor wuoda".

To jopurgo ka noneno wuode ,ne giwacho kendgi niya "Jali e jacham gikeni;biuru wanege ,mondo wakaw mwandune".Mi ne gimake ,ne giwite oko e puoth mizabibu ne ginege .

Ka wuon puoth mizabibuno nobi ,to notim ang'o ni jopurgo?¹⁹³

Yaye Jerusalem ,Jerusalem ,in minego jonabi ,kendo jo moor iri ichielo gi kite!Nadwaro choko nyithindi nyadidi ,kaka nyaburi choko nyigwende e bwo bwombe,to ne ok udwar.Neueru idu owenu.to awachonu ni ok ununena nyaka chop chieng' ma unuwachie niya "En ng'a moguedhi ma biro e nying ruoth".¹⁹⁴

Yaye!di ne ing'e tinende gik ma dikeni kuwe !To koro ogeng'ore ni wang'i .Chuny ji noa nikech luoro gik ma biro timore e piny kendo teko mag polo noyiengni.¹⁹⁵

192 Mathayo 24:34

193 Mathayo 21:33-39

194 Luka 13:34,35

195 Luka 19:42;21:26

Giko mar ndalo kochopo ,ka uneno gi mokuer ma kelo kethruok ,ma janabi Daniel nowacho ,kochung' e ka maler,eka jo manie Judea mondo giniringi gidhi e gode.Ng'a manie tat ot kik olor mundo ogol gik moko manie ode ;kendo ng'a manie puodho kik odog pacho ogol lawe .Yaye nodok malit ni mon man gi ich kod ma dhodho nyithindo ndalogo.

To lemuru mundo kiki dera maru timre e ndalo mag koyo kata chieng' Sabato;nikech ndalogo masira maduong' nobedie ma pok nobedoe nyaka a cahkruok piny nyaka chil kawuono,kendo ok nochak obedie ngang' .Dina ndalogo ok ong'adi onge ng'a ma dotony.to nikech jo moyier ndalogo nong'adi 196

Nikech ndalo nobini ,ka waiski nokuny aluor bur,ginilwori,kendo ginigeng'i koni gi koni ,kendo ginigoyi piny,in gi nyithindi manie iyi,to ok giniwe kidi achiel moluwowore e wi wadgi ,nikech ne ok ing'eyo ndalo ma ne olimie.197

Uneno gigi duto?Adier awachonu ni.kidi ok nodong' e wi wadgi ,ma ok nomukre!Ogendini biro nyono Jerusalem nyaka ndalo mag Ogendini norum.198

To ka nuwinj lwenje gi koko ,kik ubwogi .Magi onego timre mokwongo ,to giko podi .Oganda noked gi oganda ,kendo pinyruoth gi pinyruoth.Piny noyiengni kuonde moko ;kech gi tuoche nobedie ,kendo bwogruok gi ranyisi madongo nobedi e polo.

Ranyisi nobed kod dhier e piny nikech mor nam kendo nikech apekni.

Kuonde moko kech nobedie ,kendo piny noyiengni.To magi duto gin chakruok mar masiche malit.Kendo nikech richo nomedre ,hera mar ji mang'eny nodik mang'ich.199

Eka giniteru kar masira,kendo gininegu,kendo ogandni duto nosin kodu nikech nyinga .To rituru kusayo pile ,mondo uyud teko mar tony e magi duto ma nobi,kendo chung' e nyim wuod dhano.200

To puonjreuru ngero kuom ng'owo ;ka bade koro odoko mayom kendo golo pote ,ung'eyo ni oro chiegni ,kamano bende ,kuneno magi duto,ng'eueru ni ochiegni,e dho ot.

To kuom chieng'no gi sano onge ng'a mong'eyo kata malaika mag polo kata Wuowi to mana wuor kende.

196 Mathayo24:16-22

197Luka 19:43,44

198 Mathayo 24:2;Luka 2:24

199 Luka 21:9-11;Mathayo 24:7,8,12

200 Matahyo 24:9;Luka 21:36

201 Mathayo 24:32,33,36.

DUOGO WUOD NYASAYE

E momiyo rituru;nikech ok ung'eyo ni chieng' mane ma Ruodhi nobie.²⁰²

Ritreuru kik ng'ato omiu lal. Nikech ji mang'eny nobi e nyingga ka giwacho niya “an e Kristo ,kendo gini mi ji mang'eny lal ,kendo ji mathoth nosieki ma wuondore ni gin jonabi ,mi ginimi ji mang'eny lal.²⁰³

Ndalogo ,ka ng'ato nowachnu niya “Neuru Kristo ni ka” kata ni en kacha ,kik uyie.Nikech jowuond mang'eny ma ketore ni gin Kristo ,to moko gin jonabi ;ginitim ranyisi madongo gi honini ,ni mondo ka nyalore gi mi kata jo moyier lal. Omiyo ka giwachonu ni “Neuru en e thim ,kik uwuogi kata ni “Neuru en e ot”,kik uyie .Nikech kaka mil polo wuok e yor wuok chieng’ monenore nyaka imbo,e kaka biro wuod dhano nobedi.²⁰⁴

Eka ranyis mar Wuod dhano nonenre e polo ;dhoudi duto mag piny noyawre,kendo ginine Wuod dhano ka biro e wi boche polo kod teko gi duong’ maler mang’ongo. Enoor malaika mage ka tung’ ywak matek ,mi ginichok joge nyaka a tung’ polo konchiel ,nyaka komachielo.²⁰⁵

Kaka ndalo mag Nowa nobet ,e kaka biro mar wuod dhano nobedi.Nikech e kaka ndalogo ka ne ataro mar pi podi,ne gichiemo,kendo ne gimetho ,ne gikendo bende ne ikendogi nyaka chop chieng’ ma ne Nowa odonjo e yie.To ne ok odonjonigi nyaka ataro nobiro,kendo yuoyogi giduto ,e kaka biro mar wuod dhano bande nobedi.²⁰⁶

Kendo e kaka nobedo e ndalo mag Lut:ne gichiemo,ne gimetho ne ging’iewo,negihono ,ne gichuoyo ne gigedo,to chieng’ ma Lut oa e Sodom ,mach gi kibrit nochue moa e polo ,motiekogi duto.E kaka nobed chieng’ ma wuod dhano nonyisree.²⁰⁷

202 Mathayo 24:42

203 Mathayo 24:4,5,11

204 Mathayo 24:23-27

205 Mathayo 24:30,31;26:24;16:27

206 Mathayo 24:37-39

207 Luka 17:28-30

Ritreuru uwegi ,dipo ka chunyu opong' gi ich lach ,kod mer ,gi parruok mag ngimani,mi ndalono upo kochopo kuomu ka obadho;nikech ndalono nobi opo ji duto modak e piny ngima .208

Chieng'ono ji ariyo nobe e puodho ,ng'at achiel nokaw to machielo nowe .Emomiyo rituru ;nikech ok ung'eyo ni chieng' mane ma ruodhu nobie.To ng'euru wachni ,ni ka dine wuon pacho ng'e sa ma jakuo biroe ,dine orito kendo dine ok oweyo kinde mondo ode opow.E momiyo un bende ikreuru ;nikech sa ma ok upar e ma wuod dhano biroe.

Nikech awchonu ni jonabi mang'eny giruodhi nogombo neno gik muneno ,to ne ok gineno,kendo winjo gik muwinjo ,to ne ok giwinjo.

E momiyo un bende ikreuru ;nikech sa ma ok upar e ma wuod dhano biroe.209

E kaka pinyruodh polo noporre kod nyiri apar ,ma wuok mondo girom ni wuon kisera.Toabich kuomgi ne ji mofuwo,to ji abich ne jo mariek;jo mofuwogo nokawo techegi ,to ne ok okawo mo;to jo mariekgo nokawo techegi gi mo bende e pukegi .Ka wuon kisera noriware ne ginur giduto kendo nindo noterogi.

To odiewuor tir koko nowuok e niya “Neuru wuon kisera biro!wuoguru mondo uromne.

Eka nyigo duto noa malo ,kendo noloso techegi.Jo mofuwo nowacho ni jo mariek niya “miwaeueru moru ,nikech techewa dwarz tho”.

To jo mariek nodwoko ni “Ngang’ dipo ka ok oromonwa kodu;ber udhi ir jo ohala ,ung’iew maru”.

Ka noyudo gidhi ng’iewo wuon kisera nobiro ,to jo moikore nodonjo kode e od kisera,kendo dho ot nolor.

Bang’ e nyiri mokogo bende nobiro ka giwachoni “Ruoth Ruoth ,yawnwaye”.

To ennodwoko niya “adier awchonu ni akiyau.”²¹⁰

208 Luka 21:34,35

209 Luka 10:24;Mathayo 24:40-44

210 Mathayo 25:1-12

Misumbnigo gin jo moguedhi ma ruodhgi kobiro nonwang' ka girite .Adier awachonu niya, nong'wan lepe ,nomigi chiemo,nobi notinigi .Ka nobi gidiewuor kata kogwen ,kendo ononwang'ogi kamano ,jogo gin jo moguedhi!.211

Rituru ,nikech ok ung'eyo chieng'no kata sano ma wuod dhano nodwogie .Kendo beduru kaka jo ma kiyo ruodhgi ,chieng' moduogo koa kisera ,mondo kobiro kendo odwong'o to giyawne piyo piyo. 212

Yot ni polo piny okadhi,moloyo dire matin achiel mar chik olal. 213

211 Luka 12:37,38

212 Mathayo 25:13;Luka 12:36

213 Luka 16:17

MIGAWO MAR AUCHIEL

**NDALO MOGIK
E NGIMA KRISTO E PINYNI**

NDHOKO MAR WUOD DHANO

Weche duto ma jonabi ondiko kuom wuod dhano biro timore.Nikech ibiro kete e lwet jo ma ok jo Yahudi ,kendo ginichare ,kendo timone malit,ka ging'ulo olawo kuome,kendo ka gisechwade ,gininege.To chieng' mar adek nochier.²¹⁴

Nyithindwa ,pod kinde matin an kodu .Unudwara kendo kata yandi awacho ni jo Yahudi niya “ka ma adhiye un ok unyal biroe,e kaka awachonu koro .Gombo asegombo chamo pasakani kodu ka pok osanda nikech akonu ni,ok an achame ngang' nyaka chop time e pinyruodh Nyasaye.nikech awchonu ni ,nyaka a kawuono ok namadh olemb mizabibu,nyaka pinyruodh Nyasaye nobi.

Makati ni e ringra mochiw nikech in,timuru ma uparago.Kikombeni e muma manyien kuom remba ,mochuernu.²¹⁵

Wuod dhano dhiyo kaka nondik kuome ;to nodok malit ni ng'atno ma ondhogo wuod dhano!dine ber ni ng'atno ka ne ok onywole.Ok awcho kuomu duto ;an ang'eyo jo ma nayiero;to mondo wach ochopi kaka nondiki ni “ng'a ma wacahmo godo kuon osegweya gi ofunj tiende .”²¹⁶

Niwe ngimani nikech an koso?adier adier awchoni ,thwon gweno ok nokog ngang' ,ka pok isekweda didek .Nikech nondiki ni “nago jakwath mi rombe noke.”²¹⁷

Abba wuoro duto nyalore kuomi ;gol kikombeni oa kuoma .to kik obed gi ma dwaro an,to mana gima in idwaro.²¹⁸

Oromo!sa ogik .Neueru!Wuod dhano iketo e lwet joricho .Ji duto mawo ligangla notho tho ligangla.²¹⁹

²¹⁴ Luka 18:31-33

²¹⁵ Johana 13:33;Luka 22:15,16,18-20

²¹⁶ Mathayo 26:24;Johana 13:18;Zaburi 41:9;Johana 13:19

²¹⁷ Johana 13:38 ;Mariko 14:27;Zekaria 13:7

²¹⁸ Mariko 14:36

²¹⁹ Mariko 14:41;Mathayo 26:52

Judas indhogo Wuod dhano mana gi nyoth koso?

Uwuok gi lingegni gi arunge ,kaka jo ma dwarz mako jamecho koso?Ka yandi an kodu pile e Hekalu ,dak ne umaka .To ma e sa maru,ma e teko loch mudho.220

Koso iparo ni ok anyal kwayo wuora ,kendo kata kawuono onyalo orona ogend malaika mag lweny ma kwan gi okadho apar gariyo?Koro asemi Wuod dhano duong' ;kendo Nyasaye osemi duong' kuome.221

220 Luka 22:48,52,53

221 Mathayo 26:53; Johana 13:31

TEM E MSALABA

Ok dibed gi teko kuoma ngang',ka di ne ok omiyi moa malo.222

An awacho ratiro ni piny,Ndalo duto napuonjo e sunagoke ,kendo e Hekalu ,ka ma jo Yahudi duto chokoree,kendo ok nawacho wach moro ling' ling'.Ang'o momiyo ipenja ?Penj jo ma nowinjo gi ma nawacho kodgi .Gin ging'eyo gi ma an nawacho. Kawacho marach nyisgi rachna ;to kawacho kare igoya nang'o?223

Pinyruodha ok mar piny .Ka da pinyruodha en mar piny ka,da jotichna okedo,mondo kik keta e lwet jo Yahudi;to koro pinyruodha ok en mar ka.

In iwacho ni an ruoth .Gi momiyo nabiro e piny ka ,en ni mondo abed janeno kuom adiera .Ng'ato ka ng'ato man kuom adiera winjo dwonda.224

Koro ibiro wito jaloch pinyni oko.Kendo an kitig'a malo a e piny,naywa ji duto ira.225

Wuora ohera nikech aweyo ngimana mundo akawe kendo.Onge ng'ato ma gole kuoma ,to an awuon aweye ,An gi teko mar weye,kendo an gi teko mar kawe kendo.Chik ni nanwang'o kuom Wuora.226

Wuoro ,wenigi;gikiya gi ma gitimo.227

Eloi ,Eloi lama sabachthani.

Nyasacha ,Nyasacha, ang'o momiyo iweya?

222 Johana19:11

223 Johana18:20,21,23

224 Johana 18:36,37

225 Johana 12:31,32

226 Johana 10:17,18

227 Luka 23:34

BANG' CHIER YESU KRISTO

Yaye un jomofuwo,ma chunyu pek kuom yie weche duto ma jonabi nowacho!Ne ok owinjore ni Kristo one masichegi,eka odonj e duong'ne koso?Kik ibed ng'at ma ok oyie ,to mana ng'at ma yie.²²⁸

Magi e wechena ma nawachonu ka ne pod an kodu,kawacho ni weche duto ma nondik kuoma e chik mar Musa ,gi jonabi,gi Zaburi nyaka chopi kama e kaka nondiki,ni nyaka osand Kristo ,kendo ochier oa kuom jo motho chieng' mar adek mondo e nyinge oyal ogendini duto wach loko chuny mondo owenigi richogi kachakore e Jerusalem.²²⁹

Ang'eyo ka ma aaye,kendo ka ma adhiyoe .To un ok ung'eyo ka ma aaye,kata ka ma adhiyoe.Un jomwalo,to an ja malo.Un jopinyni,to an ok an japinyni.²³⁰

Onge ng'ato ma noidho odhi e polo ,mak mana jal ma nolor koa e polo ,e Wuod dhano.Dhiyo ir jowetena iwachnigi ni “an aidho adhi ka wuora kendo wuonu ka Nyasacha kendoNyasachu.

Chunyu parore nang'o?Marang'o ugoyo mbaka e chunyu?Neuru lwetena gi tiendena ,e an awuon.Mulauru une,nikech jachien onge ringruok gi choke kaka uneno an go.Gin jo moguedhi ma ne ok oneno ,to oyie.²³²

Pod kinde matin ,eka jopiny ok bi nena kendo .to un ubiro nena ;nikech an angima ,un bend unubed mangima.²³³

228 Luka 24:25,26;Johana20:27

229 Luka 24:44,46,47

230 Johana 8:14,23

231 Johana 3:13;20:17

232 Luak 24:36-39;Johana 20:29

233 Johana 14:19

NDALO DUTO

Kaka Wuoro noora e kaka an bende aorou.²³⁴

Dhiuru utim ogendini duto jopuonjrena,kubatisogi e nying Wuoro gi Wuowi gi Roho maler .Dhiuru e piny uyal wach maber ni ji duto .Ng'a moyie ,kendo obatise nokwo,to ng'a ma ok oyie bura noloye.²³⁵

Rituru mich mar Wuoro mosingnu,ma nuwinjo kuoma ;nimar Johana nobatiso gi pi,to un nobatisu gi roho maler ka pok ndalo mang'eny osekadho.²³⁶

To unuyud teko ka Roho maler obiro kuomu ;kendo unudok jonenona e Jerusalem,gi Judea duto gi Samaria,kendo nyaka tung' piny.Nwang'uru Roho maler.²³⁷

Puonjuru ogendini rito weche duto ma nochiku;kendo neuru an kodu ndalo duto nyaka giko mar ndalo .²³⁸

234 Johana 20:21

235 Mathayo 28:19;Mariko 16:15,16

236 Tich joote 1:4,5

237 Tich joote 1:8;Johana 20:22

238 Mathayo 28:20